

常郡八邑艺文志

常郡八邑藝文志目錄

東里盧文弢纂定

武進莊翊昆新渠氏校補

陽湖莊毓鉉俊甫氏重校

卷九

古歌辭

四言詩

五言古詩

適吳詩

漢梁鴻

逸民吟

梁武帝

丁未之冬營房告成有亭翼然名曰勸功且爲歌詩訓迪有

衆

宋袁燮

方竹杖

明謝應芳

江陰張希尹以蚺杯飲予因索詩

謝應芳

水居四首

高攀龍

始作鎮軍參軍經曲阿作

晉陶潛

舟泊太湖

李頤

濟曲阿後湖

宋孝武帝

過歷山湛長史草堂

南平王劉鑠

歷山草堂應教

湛茂之

東望震澤

鮑照

休沐重還丹陽道中

梁謝朓

示晉陵弟

齊簡文帝

無錫歷山集

江淹

泛長溪

任昉

遊甌山

庾肩吾

往晉陵聯句

何遜

寓居公廨懷何秀才

高爽

甌山

蕭子雲

冬日家園別陽羨始興

劉孝勝

蘭臺聚

陸倕

行經季子廟

陳張正見

贈從孫義興宰銘

唐李白

登翅頭山題儷公石壁

包融

送國子張主簿

包融

酬忠公林亭

包融

東溪翫月

王昌齡

太湖秋夕

王昌齡

登秦望山

薛據

同徐雲谿侍郎新亭重陽宴集

獨孤及

送鄭端公弟移院常州

韋應物

寄高雲

皇甫冉

題高雲客舍

皇甫冉

酬裴十四

皇甫冉

別崔司直赴江東兼簡常州獨孤使君

韓翃

經湛長史草堂

并序

唐邱丹

同賦

韋夏卿

同賦

李益

同賦

于頔

同賦

呂渭

呂侍郎渭邱員外丹舊題十三世祖厯山草堂

湛賁

宿惠山寺

王武陵

同賦

朱宿

同賦

竇羣

晨過昌師院

竇羣

惠山寺肄業送懷坦上人

并記

李膺

自惠山至吳下寄酬南徐從事

李膺

息丹荆溪入陽羨南山遊善權寺

羊士諤

酬李主簿馬蹟山見寄

并序

權德輿

張公洞

李栖筠

和樂天贈吳丹

元稹

郡齋暇日酬常州陳郎中使君

白居易

送袁秀才下第歸毘陵

歐陽詹

寄義興小女子

孟郊

憶東郭居

李紳

泛五湖

李紳

茶山下作

杜牧

春日茶山病不飲酒

杜牧

初入太湖

皮日休

和皮襲美

陸龜蒙

訪陸處士羽不遇

釋皎然

卽惠山煮茶

宋蔡襄

宿善權寺追懷陳述古

劉彝

送王判官之江陰軍

梅堯臣

送王介甫知毘陵

梅堯臣

留題毘陵潘氏假山

梅堯臣

季子廟

梅堯臣

夫子篆

梅堯臣

觀毘陵甯公畫草蟲

梅堯臣

叔治遺草蟲枕屏

梅堯臣

太伯廟

蔣堂

寄焦伯強求惠泉

蘇軾

贈錢道人

蘇軾

再如常州和昔年留別

蘇軾

遊惠山

并序

蘇軾

和

秦觀

和

釋道潛

次子瞻參寥太虛同遊惠山韻

李之儀

題周孝侯廟

楊傑

暨陽居二首

王令

寄題君山亭送呂天衢秀才

蔡肇

通惠泉

葛勝仲

陪諸公遊惠山

汪藻

避地山亭野步

汪藻

寄題胡茂老樞密橫山堂

孫覲

張資政四老堂賦長句以獻

孫覲

湖湫上冢繫舟丁山田舍小憩

孫覲

吳漢逸著古書奇器甚富欲觀未果賦詩先之

孫覲

過惠山方丈酌泉試茶賦詩貽之

孫覲

龜潭二首

孫覲

濟川諸公同遊惠山因賦長句

錢紳

張公爽墓芝

鄒浩

遊善權寺

程俱

善權洞

程俱

白馬洞

程俱

神魚泓是日與諸公流杯中如西邱故事

程俱

張公洞

程俱

借居毘陵東門四首

程俱

視潯題悟空寺

陳剛中

題定山梵放軒

胡理

遊張公洞

并序

尤袤

憩懷古堂

楊萬里

銀林至東壩登舟寄宣城親戚

范成大

送邱宗卿博士出守嘉禾

呂祖謙

夏港僧舍

魏了翁

次韻

許、奕

季子廟

周馳

遊白龍山

蔣靜

銅官山

蔣捷

題季子墓

元白珽

題斬蛟橋

白珽

遊竹塢四首

馮子振

梁谿謠贈盛高霞道士

柳貫

次韻毘陵吳寅夫見寄

陳旅

雙梧歌挽王庫使

俞遠

遊惠山寺

鄭元祐

題鄒忠公墓

陳肅

春日雲林齋居

倪瓚

張與貞居雲林館宴集分韻

倪瓚

贈天甯福上人

倪瓚

夜泊芙蓉洲寄張鍊師

倪瓚

玄文館讀書

井序

倪瓚

故東流尹陳公輓詞

并序

王逢

故空谷俞先生輓詞

并序

王逢

遊鯉山

王逢

馬大沙館舍病後留別陳氏昆季

王逢

席帽山先壟圖詩

并序

王逢

三貞篇寄納麟哈刺參政

王逢

往揚名開花二鄉掩骼

王逢

義僧行

王逢

義鄧

王逢

馬洲望孤山

王逢

揚子江舟中望鷺鼻山

王逢

周處讀書臺

王逢

長廣溪漁翁頌吾祖德感慕成詩

華幼武

桃溪泛舟尋方厓士玄

周砥

同賦

馬治

龍巖

馬治

竹菌

馬治

晨詣祥符寺

明劉基

題王允岡山齋

宋濂

過白鶴溪

高啟

倪雲林畫義興山水圖

高啟

贈惠山醫僧東山

高啟

毘陵逸人黃本中

林鴻

過鄒道鄉墓有感

謝應芳

簡張希尹

謝應芳

邱氏節孝詩

謝應芳

江陰縣

韓奕

眠雲軒

張適

賦太伯廟送倪元鎮

袁凱

望惠山

王惟允

野翁山居

施廉

春風亭次袁大尹韻

沈暉

題橘頌帖後

徐顯卿

大潮山

項麒

碧蘚壇

楊守陞

石室

傅瀚

泛芙蓉湖

劉大夏

遊橫山

薛采

惠山至永定

王鏊

聽松

邵寶

宿江陰廣福寺

杭濟

遊祥符寺

杭濟

江閣寄友人

楊儀

渡江

殷雲霄

毘陵王世臣號思東不忘祖父之意因爲賦詩

倪宗正

寄靖江朱醫官

倪宗正

賀趙孝子旌表

蔡景

馬洲西浦別殷近夫

孫一元

郊行卽事

黃傳

郊行訪近齋

錢德洪

秋夜漫興

趙大河

遊惠山酌泉次唐人韻

王世貞

將遊陽羨過華明伯餞于惠山憩俞園

王世貞

發義興由東沆抵湖汭

王世貞

由張公後洞出前洞

王世貞

出張公洞經遊玉女潭

王世貞

探龍湫觀古瓊樹

王世貞

遊善權洞

王世貞

善權水洞

王世貞

碧雲寺泉

王世貞

泊舟虞山下

王世貞

二瑞篇爲靖江朱生頌其令陳君作

王世貞

俞山人公臨卜築陽羨賦寄

王世貞

贈沈飛霞

袁宏道

夏日過徐穆齋

許學彝

秋夜送戶部家叔登黃埠

華察

清溪莊

王立道

洞虛錢道士樓居

王問

栖雲山房

王問

秦從川修尊賢祠詩以紀之

彭輅

喜復二泉冉涇舊第兼謝尙按君仰山

華雲

題夫椒山

白昂

李相書堂

吳鳳徵

約來元成蕭公木遊孤山偕顧修遠舟分中韻

來集之

過驥渚值來蕭二公泛舟共遊孤山

顧宸

別仲氏後夜行晉陵道中

華叔陽

送玄卿唐主客北上

華叔陽

題止園

吳亮

桃花塢

馬同春

苦竹津

馬同春

分水祠

馬同春

題周孝侯廟

釋宗瑩

龍池白雲崖

國朝
楊大鶴

春遊蒹葭莊梅花谷下

董大翮

月下觀第二泉

董時鳴

初歸安陽山作

毛重倬

拜吳季子廟下作

王士正

毘陵歸舟

王士正

入春申礪第一曲訪愚公谷

王士正

惠山新亭爲吳無錫題

汪琬

祝英臺碧蘚菴

徐階鳳

偕老友張止菴遊鷺山

徐階鳳

夏日徐園聽湯恂如彈琴

徐階鳳

仲弟歸喜劇成詩

金攷

之官靖江拈筆言志

鄭重

讀書漫園文成示友

曹禾

灌園

顧貞觀

立冬日荆溪道中

顧貞觀

杜鵑花紀事

并引

湯原清

念別

嵇永仁

雨後登惠山最高頂

邵長蘅

小憩漪瀾堂汲泉煮茗

邵長蘅

夏夜漳滏村居

邵長蘅

竹茶爐聯句

并序

朱彝尊

梁溪道上懷東林道南講院

彭定求

咏荆南古蹟

吳本嵩

壽楊賓賓太翁紫來先生七十

吳昌

同諸公遊龍池適見雲海

潘眉

東坡書院

儲欣

菽乳和楊芝田先生

朱昆田

追輓盧忠烈公

顧景文

惠山品泉兼至秦園小憩

汪德容

和三唐人惠山詩

陳大成

黃埠墩

姚夢熊

雪後寒慄主人解衣謝却之

史周沅

夏日遊惠山寺僧示竹茶爐詩卷

儲麟趾

張公洞

儲麟趾

十字碑

儲麟趾

藝蘭

趙曦明

城南懷古

楊燕詒

次女出閣

刑部郎中
吳楫母 左恭人

常郡八邑藝文志卷九

東里盧文弢纂定

武進莊翊昆新渠氏校補

陽湖莊毓鉉俊甫氏重校

古歌辭

適吳詩

漢梁鴻

逝舊邦兮遐征將遙集兮東南心惓惓兮傷悴志菲菲兮升降欲
乘策兮縱邁疾吾俗兮作讒競舉枉兮錯直咸先佞兮哢哢固靡
慙兮獨建冀異州兮尙賢聊逍遙兮遨嬉纘仲尼兮周流儻云覩
兮我悅遂舍車兮卽浮過季札兮延陵求魯連兮海隅雖不察兮
光貌幸神靈兮與休惟季春兮華阜麥含英兮方秀哀茂時兮逾

邁愍芳香兮日臭悼吾心兮不獲長委結兮焉究口鬱鬱兮余訓
嗟恇恇兮誰畱

四言詩

逸民吟

梁武帝

如壘生木木有異心如林鳴鳥鳥有殊音如江遊魚魚有浮沈巖
巖山高湛湛水深事迹易見理相難尋

丁未之冬營房告成有亭翼然名之曰勸功且爲歌詩訓迪
有眾

朱袁燮

維此江壖控扼之所居安思危可無備禦維彼強狡巧於乘隙萌
稟弗除其欲罔極孰堪制之維汝弓兵猛虎在山百獸震驚勇無

堅敵謀無遺慮如彼獵師靡逸狐兔亦如農夫耰耨是芟寇盜斯
戢善良斯安吾民膏血爲汝衣食可不念此爲民除慝國用方窘
於汝常給可不念此竭誠報國無或徇私貪求肆虐無或荒嬉酣
飲蒲博強汝志氣精汝武藝習汝行陳昭汝果毅我聞在昔元勳
茂烈發迹弧矢登壇授鉞反觀此身均一丈夫彼旣能然我豈不
如黽勉從事不辭險阻風餐露宿含辛茹苦汝身則勞民獲安堵
肝膽忠義神其福汝我作營房亦旣勞止用集爾眾緩急有備營
房之居義均弟兄務在和睦毋或紛爭營房之居法如軍旅什伍
相長其傳自古以大總小先正其身以小承大期於率循我築斯
亭名曰勸功爾有勤勞是獎是崇爾或有罪吾不汝貸鞭扑斥逐

其恥爲大凡爾有眾各敬爾德習此歌詩持循罔失

方竹杖

有序

明謝應芳

予性喜方偶得一方竹爲杖甚愛之因念古之崇節義尙廉隅者類焉刻詩其端持以自警

猗歟竹君易園爲方虛心固節悉如其常其方伊何如玉界尺不砥而平不繩而直曰予老矣賴君扶持義以方外庶克似之

江陰張希尹以蚶杯飲予且曰是杯得自句曲張外史於今三十年請爲賦詩

謝應芳

溝南老仙出杯孔奇酌言詢之杯從何來匪兕而觥匪玉而卮不瑯不鏤不覆不欹謂爲蚌耶鷸胡弗持謂爲蛤耶雀笑爾爲測海

之繇其始庶幾老仙笑言子宜背闕瓦壘之文微蚶而誰水族之
秀實生天池昔逢羽人觀乃朵頤麴蘖爲棖華陽同歸轉客我者
卅年於茲如李白氏杯鸚杓鵠醺風酌月朝斯夕斯走亦何幸數
從宴娛百憂俱忘是用作詩

水居四首

高攀龍

微雨乍過好風徐來遊觀斷續眾峯皆開歡然撫景盡茲一杯世
事如積亦已焉哉

飲飽欣然蕩槩菰蘆芟蔓搖漾蓮花芬敷今日何日吾長五湖其
來徐徐其去于于

舉網得魚摘我園蔬烹魚煮蔬載陳我書酒中有旨書中有腴聊

爾東牕不樂何如

薄暮登樓四望遠
疇時雨旣降農人乍休
乳燕來止鯨魚出遊
萬族有樂吾亦無憂

五言古詩

始作鎮軍叅軍經曲阿作

晉陶潛

弱齡寄事外委懷在琴書
被褐欣自得屢空常晏如
時來苟冥會緩轡憩通衢
投策命晨裝暫與園田疎
眇眇孤舟逝綿綿歸思紆
我行豈不遙登降千里餘
目倦川途異心念山澤居
望雲慙高鳥臨水媿遊魚
真想初在襟誰謂形跡拘
聊且憑化遷終返班生廬

舟泊太湖

李颺

旋經義興境頓棹石蘭渚震澤爲何在今惟太湖浦圓徑縈五百
眇目眇無覩天高淼若岸長津雜如縷窈窕尋灣碕迢遞望鬱嶼
驚飈揚飛滿浮霄漾懸阻輕禽翔雲漢游鱗憩中許黯藹天時陰
岩巖舟航舞馮河安可徇靜觀戒行旅

濟曲阿後湖

宋 孝武帝

宵登毘陵路旦過雲陽郭平湖廣津濟菰渚迭明蕪和風翼歸鳥
夕氛晦山嶠驚濤翻魚藻蘋霞照桑榆

過歷山湛長史草堂

南平 王 劉 鑠

茲山蘊靈詭憑覽趣亦贍九峯相接連五渚逆縈浸層阿疲且引
絕巖暢方禁泉溜夏更寒林交晝長蔭伊予久緇涅復得味恬澹

願逐安期生於焉愜高枕

厯山草堂應教

湛茂之

閉戶守玄漠無復車馬蹟
衰廢歸邱樊歲寒見松柏
身慚睢陽老名忝梁園客
習隱非市朝追賞在山澤
離離插天樹磊磊間雲石
持此怡一生傷哉駒度隙

東望震澤

鮑照

澗漫潭洞波合沓崿嶂雲漲島遠不測岡澗近難分
幽篁愁暮見思鳥傷夕聞
以此藉沈疴棲迹別人羣
結言非盡書有念豈敷文

休沐重還丹陽道中

齊謝朓

薄遊第從告思閒願罷歸
還叩歌賦似休汝車騎非
獨池不可別

伊川難重違汀葭稍靡靡江蓼復依依田鵠遠相叫沙鳥忽爭飛
雲端楚山見林表吳岫微試與征徒望鄉淚盡沾衣賴此盈尊酌
含景望芳菲問我勞何事霑沐仰清徽志狹輕軒冕恩甚戀閨闈
歲華春有酒初服偃郊扉

示晉陵弟

梁簡文帝

零雨歧路悲送歸臨水節時事雖爲舛離憂等閒別

無錫縣歷山集

江淹

愁生白露日思起秋風年竊悲杜蘅暮擘涕弔空山落葉下楚水
別鶴唳吳田嵐氣陰不極日色半虧天攜酒情蕭瑟憑尊還惘然
一聞清琴奏獻泣方畱連況乃客子念直置絲竹間

泛長溪

任昉

徇祿聚歸糧依隱謝羈勒絕物甘離羣長懷思去國長溪水東流
震區窮水域道遇垂綸叟聊訪問津戒弭楫申九言無爲累牽纏
長泛滄浪水平明至曛黑

遊甌山

庾肩吾

去子良已久餘風今復追未必遊春草王孫自不歸寒雲間石起
秋葉下山飛

往晉陵聯句

何遜

臨別我傷悲送歸子自適劉金不可散卜蓋何由惜遜從來重分
陰未曾輕尺璧故任情一異於是望三益高爽爾自高樓寢子返

東皋陌寄語落毛人非復平原客遜問舍且求田音亂無可擇勝門成好事盤紆欲何索爽

寓居公廨懷何秀才遜

高爽

寄止鄰城闕徒然失遊聚臥聞雜沓路坐對空寂宇風扉乍開闔粉蝶時翻舞若人不在茲煩憂何得愈

甌山

蕭子雲

忽聞甌山侶萬里自相親沈寥晚霖霽重疊晴雲深

冬日家園別陽羨始興

孝儀爲陽羨令

劉孝勝

四鳥怨離羣三荆悅同處如今腰艾綬東南各殊舉且欣棠棣集彌惜光陰遽黠吏本須裁豪民亦難御願勛千金水疑思聞五湖

卷九
六
譽

蘭臺聚

陸倕

和風雜美氣下有真人游壯矣荀文若賢哉陳太邱今則蘭臺聚
方信古爲傳任君本識達張子復清流既有絕塵到復見黃中劉

行經季子廟

陳張正見

延陵高讓遠傳芳世祀移地絕遺金路松悲懸劍枝野藤侵沸井
山雨溼苔碑別有觀風處樂奏無人知

贈從孫銘宰義興

唐李白

天子思茂宰天枝得英才朗然清秋月獨出映吳臺落筆生綺繡
操刀振風雷雖屈百里鵬鷺望三台退食無外事琴堂向山開

綠水寂以閑白雲有時來河陽富奇藻彭澤縱名杯所恨不見之
猶如仰昭回元惡昔滔天疲人散幽草驚川無活鱗舉邑罕遺老
誓雪會稽恥將奔宛陵道亞相素所重投刃應桑林獨坐傷激揚
神融一開襟絃歌欣再理和樂醉人心蠹政除害馬傾巢有歸禽
壺漿候君來聚舞共謳吟農夫棄簞笠蠶女墮簪纓歡笑相拜賀
則知惠愛深歷職吾所聞稱賢爾爲最化洽一邦上名馳三江外
峻節冠雲霄通方堪遠大能文變風俗好客留軒蓋他日一來遊
因之嚴光瀬

登翹頭山題儷公石壁

包融

展登翹頭山山曠黃霧起却瞻迷向背直下失城市瞰日銜東郊

朝光生邑里掃除諸煙氛照出衆樓雉青爲洞庭山白是太湖水
蒼茫遠郊樹候忽不相似萬象以區別森然共盈几坐令開心胸
漸覺落塵滓北巖千餘仞結廬誰家子願陪中峯遊朝暮白雲裏
湖岸纔初解鶯啼別離處遙見舟中人時時一同顧坐悲芳歲晚
花落青杆樹春夢隨我心搖蕩逐君去

送國子張主簿

包融

酬忠公林亭

包融

江外有眞隱寂居歲已侵結廬在西術種樹久成陰人迹不及戶
車聲遙隔林自言解塵事咫尺能韜沈爲道豈廬霍會靜由吾心
方秋院不落仰望日蕭森持我興來趣采菊行相尋塵念到門卷

遠情對君深一談入理窟再索破幽襟安得山中信致盡移尙禽

東溪翫月

王昌齡

月從斷山口遙吐柴門端萬木紛空霽流陰中夜攢光連虛象白
氣與風露寒谷靜秋泉響巖深青靄殘澄清入幽夢影破抱空巒
恍惚琴窗裏松溪曉思難

太湖秋夕

王昌齡

水宿煙雨寒洞庭霜落微月明移舟去夜靜魂夢歸暗覺海風度
蕭蕭聞鴈飛

登秦望山

薛據

南登秦望山目極大海空朝陽半蕩漾晃朗天水紅谿壑爭噴薄

江湖遘交通而多漁商客不悟歲月窮振繯迎早潮弭櫂候長風
予本萍泛者乘流任西東茫茫天際帆棲泊何時同將尋會稽迹
從此訪任公

奉同徐侍郎五雲溪新亭重陽宴集作

獨孤及

萬峯蒼翠色雙谿清淺流已符東山趣況值江南秋白露天地肅
黃花門館幽山公惜美景肯爲芳樽留五馬照池塘繁絃催獻酬
風前孟嘉帽乘興李膺舟騁望傲千古當歌遺四愁豈令永和人
獨擅山陰遊

送鄭端公弟移院常州

韋應物

時瞻憲臣重禮爲內兄全公程儼見責私愛信不愆況昔陪朝列

今茲俱海壖清觴方共酌天書忽告遷豈徒咫尺地使我心思綿
應當自此始歸拜雲臺前

寄高雲

皇甫冉

南徐風日好悵望毘陵道毘陵有故人一見恨無因獨戀青山久
惟令白髮新每嫌持手板時見著頭巾煙雨臨寒景農桑起仲春
家貧仍嗜酒往事今何有芳草遍江南勞心憶攜手

題高雲客舍

皇甫冉

孤興日自深浮雲非所仰窻中西城峻樹外東川廣晏起簪葛巾
閒吟倚藜杖阮公道在醉莊子生恒養五柳轉扶疎千峯恣來往
清秋香穫成白雪寒菜長吳國帶風煙平陵延夢想時人趣纓弁

高鳥遑羅網世事徒糾紛吾心方浩蕩惟將山與水處處諧真賞

酬裴十四

皇甫冉

淮海每聯翩三年方一見素心終不易玄髮何須變舊國想平陵
春山滿陽羨鄰雞莫遽唱共憶良夜宴

贈別崔司直赴江東兼簡常州獨孤使君

韓翃

愛君青袍色芳草能相似官重法家流名高墨曹吏春衣淮上宿
美酒江邊醉楚酪沃雕胡湘羹糝香餌前朝山水國舊日風流地
蘇山逐青驄江家驅白鼻右軍尙年少三領東方騎亦過小丹陽
應知百城貴

經湛長史草堂

并序

邱丹

無錫縣西郊五里有惠山寺卽宋司徒右長史湛茂之之別墅也舊名厯山故南平王劉鑠有過湛長史厯山草堂詩湛有酬和其文野而典特以松石自怡逍遙沈寂終見止足之意可謂當時高賢矣至齊竟陵王友江淹亦有繼作余登茲山以觀三篇列於石壁仰覽遺韻穆若清風遽訪湛氏胄裔山下猶有一二十族得十三代孫略觀其譜書殘墨塵蠹年世雖邈瑩壟尙存余披宋史略不見其人心每惻歎悲夫斯人也而史闕書然有其一篇則爲不朽矣因復追緝六韻以次三賢之末時有釋若冰者蹤蹟茲山修念之餘鑿嵌注壑醺入諸界無非金碧鉢帽之資悉償工費是以道友邑僚諷翫嘉賞嗚呼得非茂之之

緣果而陰隲於上人不然何竭慮之至耶余聖唐山令臣也屏
居臨乎山墅亦有年矣常諷茂之篇句云衰廢歸邱樊歲寒見
松柏不覺禪意超散若在廬霍之間矣異時同歸猶茂之之不
忘也嗟乎湛君用刊巖石俟後世之知我者得不繼之乎貞
元六年歲在庚午檢校尚書戶部員外郎兼侍御史邱丹詩
身退謝名累道存嘉止足設醴降華幡挂冠守空谷偶尋野外寺
仰慕賢者躅不見昔簪裾猶存舊松竹煙霞雖異世風韻如在矚
余仰江海人歸輟青山曲

同賦

韋夏卿

道勝物能齊累輕身易退苟安一邱上何必三山外雲霞長若綺

松石常如黛徒有昔王過竟遺青史載詩因野寺詠酒向山椒醉
異時逢爾知茲辰駐余旆

同賦

李益

昔降英王顧屏身幽岩曲靈波結繁笳爽籟赴鳴玉運轉春華至
歲來山草綠青松掩落暉白雲竟空谷伊人無遺蹟惻惻芳又縹
云誰敦美香分毫寄明牧

同賦

于頔

蕭條歷山水木無氛滓王門結長裾岩扃怡暮齒昔賢枕高躅
今彥仰知止依依囑煙霞眷眷返墟里湛生久已沒邱也亦同恥
立言咸不朽何必在青史

同賦

呂渭

巖居舊風景人世成今昔木落故山空猿啼秋月白誰同西府僚
幾謝南平客摧殘松桂花蕭散煙雲夕蹟留異代遠境入空門寂
惟有草堂僧陳詩在石壁

伏覽呂侍郎

渭

邱員外

丹

舊題十三世祖厯山草堂詩因書

記事

湛賁

名遂貴知己道勝方晦迹高居葺蓮宮遺文煥石壁桑田代已變
池草春猶碧識曲遇周郎知音荷宗伯調逸南平兆風清建安蹟
祖德今發揚還同書史冊

宿惠山寺

井序

王武陵

戊辰秋八月吳郡朱遐景自秦還吳南次無錫命予及故人竇
丹列會於惠山之精舍是時山林始秋高興在目涼風白雲起
於坐隅逍遙於長松之下偃息於盤谷之上仰視雲嶺俯瞰寒
泉夕陽西歸皓月東出羣動皆息視身如空玄言妙論以極窮
奧丹列有遜世之志遐景有塵外之心予亦樂天知命怡然契
合視富貴如浮雲一歌一詠以紓性情夫良辰嘉會古人所惜
序述不作是闕文也山林之下景物秀茂賦詩導意以紀方外
之游

秋日游古寺秋山正蒼蒼泛舟次岩壑稽首金仙堂下有寒泉流
上有珍禽翔石門吐明月竹木涵清光中夜何沈沈但聞松桂香

曠然出塵境憂慮澹已忘

同賦

朱宿

古寺隱秋山登攀度林樾悠然青蓮界此地塵境絕機閒任晝昏
慮澹知生滅微吹遞遙泉疎松對殘月庭虛露華綴池靜荷香發
心悟形未留遲遲履歸轍

同賦

竇羣

共訪青山寺曾隱南朝人問古松桂老開襟言笑新步移月亦出
水映石磷磷予洗腸中酒君濯纓上塵皓彩入幽抱清氣逼蒼旻
信此澹忘歸淹留冰玉鄰

元和二年五月三日重游此寺獨覽舊題二十年矣當時三人

皆登諫列朱遐景方詣行車王晦伯尋卒郎署余自西掖累遷
外臺復此躊躇吁嗟存沒朱拾遺詩云歲月人間促煙霞此地
多殷勤竹林寺更得幾回過可謂得詩人之思也因命題壁以
識所懷山南東道節度副使檢校兵部郎中兼御史中丞賜紫
金魚袋竇羣記

蘧舅氏扶風公貞元四年秋八月與太原王武陵吳郡朱宿同
遊惠山精舍爲賦往體詩一首王序而題之觀其詞頗有世外
之交出塵之想凝思澹慮泛溢天格雖建安才人不足居其右
矣後二十年復繼於末則有傷時歎逝之感宿草鄰笛之悲洎
會昌初武皇帝驟浮圖法詔毀其宮而逐其徒惠山在毀中時

無好事者詩亦隨塵焉今寺旣復而詩尙遺落內弟審餘寓書
請於遠會遽赴河陽辟召路出寺下因重記於軒廊南垣我舅
氏由吏部拜執法器業磊落爲時鉅人平生操尙備在國史此
不能舉所載者風韻之詞登臨之興俾後人挹其清芬而已大
中十一年五月十三日懷孟等州觀察使試大理評事兼監察
御史李遵重題

晨過昌師院

竇羣

深庭芳草濃曉井山泉溢林馥亂沈煙石潤侵經室幽巖鳥飛靜
晴嶺雲歸密壁蘚瀝蒼華竹陰漏晴日生期半宵夢憂緒仍非一
若無高世心安能此終畢

惠山寺肄業送懷坦上人

李 隱

流水何山分浮雲空中遇我生無根株聚散亦難固憶昨鬪龍春
巖棲侶高步清懷去羈束幽境無滓汚日落九峯明煙生萬華暮
茲歡未云隔前笑候已故四時難信留百草換霜露離襟一成解
悵抱將何諭驚泉有餘哀永日誰與度緬思孤帆影再往重江路
去去忽悽悲因風暫回顧

大和五年四月予自江東將西歸洛陽路出錫邑因肄業於惠
山寺居三歲其所諷念左氏春秋詩易及司馬遷班固史屈原
離騷莊周韓非書記及著歌詩數百篇其詩凡言山中事者悉
記之於屋壁文則不載其寺會昌末經廢毀屋室殆無存者去

年蒙恩自禁職出鎮鍾陵鍾陵與毘陵地不相遠而惠山居其屬邑聞其寺復置會錫邑宰去年過此留宴數日令於予爲故人因寓書請再題焉嗚呼自太和癸丑至咸通己丑三紀餘矣念邑中居人與僧居在惠山興甯兩寺者今無人焉染翰增悲復何言耳咸通十年二月一日江南西道都團練觀察處置等使中散大夫檢校左散騎常侍使持節都督洪州諸軍事兼洪州刺史御史中丞上柱國賜紫金魚袋李隲題記

自惠山至吳下寄酬南徐從事

李隲

不接芳辰游獨此長洲苑風顏一成阻翰墨勞空返悠悠汀渚長杳杳蘋花晚如何西府歡尙念東吳遠瑤音動清韻蘭思芬盈畹

猶及九峯春歸吟白雲嶽

息舟荆溪入陽羨南山遊善權寺呈李功曹巨

羊士諤

結纜蘭渚曉柴車上連岡晏溫值初霽去繞山阿長獻歲冰雪盡
細泉生路旁行披煙杉入澗澗橫石梁層閣表精廬飛薈切雲翔
沖襟得高步清眺極遠方潭嶂積佳氣萋萋多早芳具觀澤國秀
重使春心傷念遠煩促途榮利驚陳光勉君脫冠意其匿無何鄉

酬李二十二兄主簿馬跡山見寄

并序

權德輿

族內兄暢純靜而深直方而文與予同寓居丹陽丹陽郭北四
十里所有馬跡山山有奇峯怪石且多昔賢真仙之所遊踐方

外士殷渙然通易經老巖之旨居於山下從舅原均探異好古
亦往來棲息其間貞元元年兄以典校秘書調補江陵松滋主
簿以地遠不就職予以環衛冗秩罷漕輓從事且久家居食貧
里巷相接其明年兄命駕遊此山予以疾故不克偕往旣而猥
辱鍾陵檄召兄自山中以詩一首見貽理精詞達清滌心府三
復其文如至山下終篇則戲以出處之跡見誚故予復之於此
章仍加六十字以就全數

杳杳壘外想悠悠區中緣如何戰未勝曾是教所牽遠郊有靈峯
夙昔棲真仙鸞聲去已久馬跡空依然丹崖轉初旭碧落凝秋煙
松風其蕭颯蘿月想嬋娟內兄蘊遐心嘉遜性所便不能棲枳棘

且復探雲泉中有冥寂人閒讀逍遙篇聯袂共支策振衣嘗絕編
徐行石上苔靜聽風中絃煙霞涇儒服日月生寥天新詩來起子
璀璨六義全能盡含寫意轉令山水鮮若聞笙鶴聲宛在耳目前
登攀阻心賞愁絕空懷賢出處豈異途心冥卽真筌暫從西府檄
終卧東菑田不嫌予步蹇但恐君行羶如能固曠懷谷口期窮年

張公洞

李栖筠

一逕深窈窕上升翠微中忽然靈洞前日月開仙宮道士十二人
往還馭清風焚香入深洞巨石如虛空夙夜備蘋藻詔書祠張公
五雲何徘徊玄鶴下蒼穹我本道門子願言出塵籠掃除方寸間
機與神靈通宿昔勤夢想契之在深衷遲迴將不還章綬繫我躬

稽首謝眞侶辭滿歸相從

和樂天贈吳丹

元稹

不識吳生面久知吳生道跡雖染世名心本奉天老雌一守命門
迴九填血腦委氣榮衛和咽津顏色好傳聞共甲子衰潰盡枯槁
獨有冰雪容纖華奮鮮縞問人何能爾吳實曠懷抱弁冕徒挂身
身外非所寶伊予固童昧希眞亦云早石壇玉晨尊晝夜長自掃
密印視丹田神游夢三島萬過黃庭經一食青精稻冥搜方朔桃
結念安期棗綠鬢幸未改丹誠能自保行當擺塵纓吳門事探討
君爲先此詞終期攀瑤草

郡齋暇日酬常州陳郎中使君

白居易

新年多暇日晏起褰帷坐睡足心更慵日高頭未裹徐傾下藥酒
稍熬煎茶火誰伴寂寥身無絃琴在左遙思毘陵館春深物婀娜
波拂黃柳梢風搖白梅朵牙門排曉戟鈴閣開朝鎖太守水西來
朱衣乘素舸良辰不易得佳會無由果五馬正相望雙魚忽前墮
魚中獲瑰寶持翫何磊砢一百六十言字字靈珠顆上申心款曲
下叙時轍軻才富不如君道孤還似我敢辭官遠慢且貴身安妥
勿復問榮枯冥心無不可

送袁秀才下第歸毘陵

歐陽詹

羸馬出都門修途指江東關河昨夜雨草木非春風矢捨雖未中
璞全終待攻層霄秋可翔豈不隨高鴻

寄義興小女子

孟郊

江南莊宅淺所固惟疏籬小女未解行病叔老更癡家中多吳語
教爾遙可知山怪夜動門水妖時弄池所憂癡酒腸不解委曲辭
漁妾性嘯強耕童手皴顰想茲爲襁褓如鳥拾柴枝我詠元魯山
胸臆流甘滋終當學自乳起坐常相隨

憶東郭居

敦邱遲案此過梅里七首之一也前題云家於無錫四十載今敝廬數楹猶存列題於後志中各

按體分載

李紳

昔余過穉齒從師昧知奧徒懷利物心不獲藏身寶曳婁一縫掖
出處勞昏早醒醉迷啜哺衣裳辨顛倒忠誠貫白日直已憑蒼昊
卷舌墮譏訕驚波息行潦哀禽識舊木疲馬知歸道楊柳長庭柯

蘭茝覆堦草旌旄光里舍騎服歡妻嫂綠鬢絕新知蒼鬚稀舊老
冠綏身忝貴齋沐心長禱笙磬諒諧和庭除還灑掃棲遲還竹巷
物役浸江島倏忽變星霜悲傷滿懷抱

泛五湖

效謝惠連

李紳

范子蛻冠履扁舟逸霄漢嗟子抱險艱怵惕驚瀾漫窮通泛濫勞
趨適殊昏旦浴日蕩層空浮天祿無畔依灘落葉聚立浦驚鴻散
浪疊雪峯連山孤翠崖斷風帆同巨壑雲矗成高岸宇宙或東西
星辰沈燦爛霞生傾洞遠月吐清熒亂豈復問津迷休爲呂梁歎
漂沈生詎保覆溺心常判吳越郡異鄉嬰童反爲翫依稀古井邑
嘹唳同鶩鶴舉櫂未宵分維舟方日旰徵斯濟川力若鼓淩風翰

唐君人自漢文三
易狎當悔遊臨深罔知難

茶山下作

杜牧

春風最窈窕日曉柳村西
嬌雲光占岫健水鳴分溪
燎岩野花遠夏瑟幽鳥啼
把酒坐芳草亦有佳人攜

春日茶山病不飲酒因呈賓客

杜牧

笙歌登畫船十日清明前
山秀白雲膩溪光紅粉鮮
欲開未開花半陰半晴天
誰知病太守猶得作茶仙

初入太湖

皮日休

聞有太湖名十年未曾識
今朝得遊汎大笑稱平昔
一舍行胥塘盡日到震澤
三萬六千頃頃頃玻璃色
連空淡無類照野平絕隰

好放青翰舟堪弄白玉笛疏岑七十二雙雙露矛戟悠然嘯傲去
天涯搖畫鷁西風作獵獵驚波罨涵碧倏忽雷陣吼須臾玉崖折
樹動爲蜃尾山浮似鼉脊落照射鴻溶清輝蕩拋捲雲輕似可染
霞爛如堪摘漸暝無處泊挽帆從所適枕下聞澎湃肌上生癢癢
討異足遭迴尋幽多阻隔願風與良便吹入神仙宅甘將一蘊書
永事嵩山伯

和皮襲美

陸龜蒙

東南具區雄天水台爲一高帆大弓滿羿射爭箭疾時當暑雨後
氣象仍鬱密乍如聞鵬斂聳翅忽飛出行將十洲近坐覺八極溢
耳目駭鴻濛精神寒倍栗坑來斗呀豁湧處驚嵯嶮異拔龍湫

喧如破蛟室斯須風妥帖若受命平秩微茫識端倪遠嶠疑格筆

巉巖見銅闕

湖中穹崇山有銅闕

左右皆輔弼盤空儼相趨去勢猶橫逸嘗

聞咸池氣下注作清質至今涵赤霄向旦浴白日又云構浮玉

太湖

乃仙家浮玉之北堂

宛與崑閩匹肅爲靈官家此事難致詰纔迎沙嶼好指

顧俄已失山川互蔽虧魚鳥空聲

語彪切魚乙切

何當授真檢得召

天吳術一一問朝宗方應可譚悉

訪陸羽處士不遇

釋皎然

太湖東西路吳王大山前所思不可見歸鴻自翩翩何山賞春茗
何處弄春泉莫是滄浪子悠悠一釣船

卽惠山煮茶

朱蔡襄

茲泉何以珍適與真茶遇在物兩稱絕於予獨得趣鮮香離下雪
甘滑杯中露當能變俗骨豈特消塵慮晝靜清風生飄蕭入庭樹
中含古人意來者庶冥悟

宿善權寺追懷陳述古

劉彝

精識世所稀及道古難有伊人雖云亡遺德終不朽嘗厭石渠遊
是邦爰出守浚河納湖波股派活猷猷學宮起城隅塗人或薪樵
旣富而教之薄俗還忠厚矧余平生時皆弱賴磨琢共擷姬孔微
肯出皋稷後醇源浩罔涯實行靡容苟猶期老巖阿寂寞待同扣
天平奪大成旅葬宜興阜我來薤荆榛雨淚滴杯酒慟哭起秋風
落葉紛林藪永懷三益恩語報乏瓊玖願子生人間世世爲親友

送王判官之江陰軍幕

梅堯臣

往時初渡江頗愛江南美誰知坐臥閒思極煙波裏絮逐魴魚繁
鼓添蕤線紫君行語風物到日應相似

送王介甫知毘陵詩

梅堯臣

吳牛常畏熱吳田常畏枯有樹不蔭犢有水不溉稼孰知事春農
但知急秋租太守迫縣官堂上怒奮鬚縣官促里長堂下鞭扑俱
不體天子仁不恤黔首逋借問彼爲政一一何所殊今君請郡去
預喜民將蘇每觀二千石結束辭國都絲鞵加錦緣銀勒以金塗
兵吏擁後隊劔撾盛前驅君又不若此革轡障泥污款行問風俗
低意撫疲驚下情靡不達略細舉其羸曾肯爲眾異亦罔爲世趨

學詩問已熱愛棠理豈無

留題毘陵潘氏假山

梅堯臣

人心本好靜世事方擾擾邱壑未去時庭中結山小長欲見蒼翠何須聽猿鳥有志同向平當期婚嫁了

季子廟

梅堯臣

信如季子賢自昔知能幾依約有荒祠寂寞無奠饗篚壤梁生溼菌古木憑山鬼英靈豈顧茲青史辭豐臺

夫子篆

碑在江陰申港舊屬晉陵

梅堯臣

季子墓傍碑古稱尼父篆始沿春秋義十字固莫剗磨敲任牧童侵剝因野蘚嗟爾後之人萬言書亦淺

觀毘陵宣公畫草蟲

梅堯臣

古人畫虎鵠尙類狗與鷲今看畫羽蟲形意兩俱足行者勢如去
飛者翻若逐拒者如舉臂鳴者如動腹躍者趨其股顧者注其目
乃知造物靈未抵毫端述毘陵多畫工圖寫空盈幅宣公實神授
坐使羣輩伏草根有纖意醉墨得已熟權豪不可致節行今乃獨
叔治遺草蟲枕屏

梅堯臣

世傳毘陵畫絕妙僧居宣不爲權貴通所與乃忘形吳機三尺素
落筆酒未醒忽爲雙飛蜂忽就一蜻蜓螳蝦相拒立促織如可聽
蚣蝓與螻蛄行躍勢未停竹蟬及鬼蝶飄飄翻翅翎蚊蚋亦具體
纖悉皆可名廣宗潘叔治持作枕間屏我行因以贈益見雙眸清

太伯廟

蔣堂

太伯何爲者不以身爲身
逖避天下位奔走句吳濱
隱德照來世遺祀傳斯民
吁此廉讓國合生廉讓人

寄焦伯強知縣求惠山泉

蘇軾

茲山定空中乳水滿其腹
遇隙則發見臭味實一族
淺深各有值方圓隨所蓄
或爲雲洶湧或作綫斷續
或鳴空洞中雜珮間琴筑
或流蒼石縫宛轉龍鸞蹙
瓶罌走千里眞僞半相漬
貴人高宴罷醉眼亂紅綠
赤泥開方印紫餅截圓玉
傾甌共歎賞竊語笑童僕
豈如泉上僧盥灑自挹掄
故人憐我病竊籠寄新馥
欠伸北窗下晝睡美方熟
精品厭凡泉願子致一斛

贈錢道人

蘇軾

書生苦信書世事仍臆度不量力所負輕出千鈞諾當時一快意
事過有餘忤不知幾州鐵鑄此一大錯我生涉憂患常恐長罪惡
靜觀殊可喜腳淺猶容卻而況錢夫子萬事初不作相逢更何言
無病亦無藥

再如常州和昔年留別

蘇軾

偃僂山前叟迎我如迎新那知夢幻軀念念非昔人江湖久放浪
朝市誰相親卻尋泉源去桃花逢避秦

遊惠山

并

蘇軾

余昔爲錢塘倅往來無錫未嘗不知惠山旣去五年復爲湖州

與高郵秦太虛杭僧參寥同至覽唐處士王武陵竇羣朱宿所
賦詩愛其語清簡蕭然有出羣之姿用其韻賦三首

夢裏五年過覺來雙鬢蒼還將塵土足一步猗闌堂俯窺松桂影
仰見鴻鶴翔炯然肺腑間已作冰雪光虛明中有色清淨自生香
還從世俗去永與世俗忘

薄雲不遮山疎雨不溼人蕭蕭松徑滑策策芒鞋新嘉我二三子
皎然無緇磷勝遊豈殊昔清句仍絕塵弔古泣舊史疾讒歌小旻
哀哉扶風子難與巢許鄰

敲火發山泉烹茶避林樾明窗傾紫盞色味兩奇絕吾生眠食耳
一飽萬想滅頗笑玉川子饑弄三百月豈如山中人睡起山花發

一甌誰與其門外無來轍

和

秦觀

輟棹縱幽討藍輿入青蒼圓頂相邀迓旃檀燎深堂層巒澹如洗
傑閣森欲翔林芳含雨滋岫日開雲光涓涓續清溜靡靡傳幽香
俯仰任登覽悠然身世忘

使君厭機械所與唯散人顧慚蒹葭陋謬倚瓊林新上千青礪礪
下矚白磷磷洞天不知老金界無栖塵緬彼人間世烏蟾閱青旻
詎得踵三隱巖阿相與鄰

樓觀相復重邈然閣深樾九龍吐清冷灑灑曾不絕巖遞馳千里
眞味猶未滅况復足茶山茲焉越葵月岸巾塵想消散策佳興發

何以慰游嬉操瓢繼前轍

和

釋道潛

山烟弄滅沒山木含蔥蒼刺舟傍遙岸理策升虛堂周遭矚層巘
矯矯如翱翔下瞰平田流澹然浮日光青簟解初籜洗雨聞清香
雖云迫前途眞賞豈易忘

松門暗朝雨寂歷無行人隆曦忽穿漏卉木蔚已新階泉漱石齒
照眼光磷磷使君美無度卓犖遺髯塵風標傲竹柏談笑凌穹昊
何媿沈冥子卧霞共結鄰

揚帆渡江來洗眼驚翠樾雲姿旣容裔鳥哢更清絕凌梯訪前蹤
琬琰亦未滅嗟我魚目光疇能綴明月狂墨掃琅玕風烟坐中發

殊勝區中人茫茫走飛轍

子瞻參寥太虛同遊惠山用王武陵竇羣朱宿三詩韻各有
所賦參寥錄以相示予將遊焉因次其韻 李之儀

曾爲惠山客心已寄莽蒼知今幾何時常在山間堂淹留情莫攀
悵望自疑翔聯翩得秀句古殿逢燈光耳冷徹孤神境幽拂清香
買舟行有期此興安能忘

三子骨已朽來者非一人簫聲起孤鳳抑按皆清新松陰貯老月
蘇暈涵蒼磷崎嶇固有履千載無纖塵物物吾已矣今昔均可旻
何當事一塵顧水終爲鄰

膏肓有前人老意繁叢樾差池紛續霜味蠟火已絕一啜風漱液

幽思起復滅詎慚數及七緬子在明月疏更蹇脩途景耿重激發
泠然倘可御千古同一轍

題周孝侯廟

楊傑

長橋漲時波南山滴空翠清風孝侯祠六月薄炎熾蒼然擁喬木
廊宇深以邃升堂拜遺像凜凜增壯氣緬懷絕塵姿跡弛幾自棄
一念狂聖分千秋仰高義義興阻湖山從古勞撫治況當離亂後
生理多不遂連州虎爲害接浦蛟作祟故國神所遊陰相得無意
我來按茲郡強禦甯汝畏恐彼蛟虎徒匿影知暫避不埋張綱輪
徒攬范滂轡澄清悵何時留意志予愧

暨陽居二首

王令

出無王事牽入不治居含蒿藜入牆屋塵垢變几架糟糠苟無憂
智力取自暇逢詩卽廢日得客輒忘夜積懶遂成性習勤反如詐
幾不類怠傲愧恥將何謝

身非爵與官車馬久不謀家無田倉儲雀鼠非我仇朝出從人居
詩書講前修暮從兒子嬉歡笑何所憂閑將筋力疲懶使志慮收
斗醕尙煩送誰謂能無求

寄題君山亭送呂天衢秀才

蔡肇

百川赴下流江海互吞吐回瀾薄空日老岸不立土坡陀出巨石
鼇背敞窗戶我來俯凝碧萬頃過微雨南沙八十里草木盡可數
風聲玄冥開松景翠蛟舞昏昏魚龍氣暝色失洲渚林間古蘭若

梵唄雜鳴櫓不能挂長帆破浪極幽渚至今清夜夢窈窕越修阻
喜君自茲來浩浩見眉宇館置古城東淡飯忘羈旅連城雖自珍
愿塊誰爲許束書問東舟了不挂一語脫身少年場清座參佛祖
冰顏未生髭老氣欲冠古所得豈虛名自是慰諸呂南天正炎溽
歸思亟飛羽江魚已釣肥江酒尙酤煮訪予昔遊地耿耿月沈浦
席罷望東南浮雲渺吳楚

通惠泉

爲錢紳
仲作

葛勝仲

山翁微骨清日飲一瓢水天公隱其窮殆將貽石髓先敕西神君
一派疏清泚初驚石罅出盈科來未已其瀦爲淵潭其匯則沼沚
酌彼九龍泉錫味參差是一甌紫筍春牙頰留甘美餘波俱濯纓

澣沫邀洗耳山中有異事喜甚屐折齒長安昊天觀秦吳隔千里
妄云脈絡通道人眞疏矣寄語贊皇公未應停水遞

陪諸公遊惠山

汪藻

茲山定中腴秀色乃如許連峯積蒼潤嵐氣亦如雨珍泉不浪出
世俗那得取羣仙作佛供洒此玉池股甘寒飲天下瓶盎走膏乳
兒嬉供茗事雲散入江渚當源起臺殿下瞰松栢古巍基首梁朱
爽氣接吳楚我來值佳月濟勝得稽呂聊分小蒼璧同振百年羽
躋攀興未極落日在林莽卻立望翠屏中流駐鳴櫓

遊地山亭野步

汪藻

今日幸無雨天空出遙岑行行不知疲遂至春江潯汲路轉籬落

人家在桑陰平疇漲清波隴麥如人深溝畎戲鳬鷺新蒲映浮沈
我生木樵漁對此諾初心景物豈不好悲來自難任風塵暗中原
四海如驚禽黃屋狩萬里兩宮隔辰參龍移螻蟻窺月晦蟾蜍侵
宇宙有傾覆茲游豈嶮嶮欽消憂賴濁醪太息誰能斟

寄題胡茂老樞密橫山堂

孫觀

古縣山水國萬室蟠其中環城千嶂合並舍百泉通我公擅一壑
層雲生盪胸放神八極外坐駕兩腋風峨峨十二鬟半出簾幕重
修眉畫新就一抹翠掃空欣對愜平生似爲悅己容百金置酒地
窗戶浮青紅高稜拄笏見采菊籬下逢坡陀徑千尺橫絕垂天虹
日麗鶯谷曉沙暄燕泥融悠然命巾車往往載客從太白琢天巧

朱絃奏三終溪山久寂寥高詞擅無窮天王駕羣英長轡係九戎
焉知橫山下一榻臥老龍功名方鼎來龜祥兆非熊勒石頌中興
浯臺兩穹崇西川歸謝傅東海表太公千年丁令威騎鶴還故宮
大資政張公築堂里舍日與兄弟遊其間號四老公卿大夫
皆賦詩以紀一時之盛昔崇甯初公以舉首薦送禮部而
某叨綴下陳大觀間天子策士於庭公三兄弟連名並中而
某爲同年進士於布衣之舊莫逾某者輒課長句以獻

孫觀

真人東方行攜幼坐小輦五星聚光州八龍臥偃蹇張公世忠孝
七葉冠蟬冕翹翹麟一角濯濯蕙九畹聲名大小馮門巷南北阮

填饒自鳴和滿耳聽曉春粟悲漢謠燃其笑魏福詎問華亭鶴
空憶上蔡犬堂堂鼎軸老秉道迪天顯甯投千金璧不踐九折阪
飛飛鴻雁行戀戀桑榆暖草木商山春煙波洞庭晚芝老正堪茹
橘熟行可寧連牀話團樂共此一笑莞當年伯仲氏衫鬢綠婉婉
綵衣戲翁側玉立盡瑚璉崢嶸天門闕笑兀今在眼歲月知幾何
華皓森雪巘扶顛屬匠石起死待和扁富貴挽不來挂頰但手板
談閒鋸屑霏酒伴金荷捲舞茵翔兩鸞歌板曳獨繭冰壺明月吐
琪樹清風滿起尋赤松遊仙籍標閬苑

湖洲上冢繫舟丁山田舍小憩

孫觀

清谿三百曲一片春風綠茆屋有人家窈窕閬深竹老去耽田里

寓目快新賜風漪卷翠綃雲巘鏤蒼玉尋盟喚白鷗解佩贖黃犢
獨嘯無一人傳聲滿空谷

吳漢逸家荆谿蓄古書奇器甚富余欲造觀而未果賦小詩
先之

孫覲

高人臥江海煙雨三家村白眼憎俗徒青山自當門披圖望千載
耿耿尙自存金鑄騷褻跡漆書科斗文虬螭盤六印犧象刻四尊
劍包虎皮斑琴漫蛇腹紋猶吐星芒寒尙帶雷斧痕我亦望古者
昂昂眞戴盆儒未倚門揮應許置榻論從公問奇字載酒過子雲

過惠山方丈啖老酌泉試茶賦雨詩遺之

孫覲

蕭蕭阿蘭若桑苧有故家佛屋倚高寒僧蹊抱欹斜殷勤泉上客

流落瘴海涯。蜨酒壓梨楂。蠻烹哈鼉蛇。光潔鏡一奩。照影空自嗟。
老僧薦茗粥。芳鮮疑露華。驅除鼻中雷。掃盡眼界花。飄飄思凌雲。
攝身上蒼霞。

戰塵霾南天。獵火炊北地。一筇辟埃氛。步入青蓮寺。眈眈九龍盤。
一壑埋老翠。倚天松骨大。粘壁苔髮細。道人本臞儒。得法妙出世。
胸中萬斛泉。洗盡蔬筍氣。天風吹泠泠。助我鳴鼓吹。名爲不二門。
聲音作佛事。

龜潭二首

孫覲

真源閤仙局。一綫下佛龕。來從白馬洞。聚作烏龜潭。觸石細瑟瑟。
循除走涵涵。漱齒類留雪。溼衣眞佩藍。醉紅灑面醒。衰白照影慚。

延緣遂清景挂策縱幽探

心閒空有味境寂澹無營石鼎脹豕腹幽幽晤泉鳴銅盤印鳥跡
漠漠微雲行起挽枝上紅細傾榼中清提壺亦勸飲布穀仍催耕
悠然獨往願一笑慳平生

濟川諸公同游惠山因成長韻

建炎九月十五日

錢紳

好山如佳人變態百種好陰晴朝暮間可愛不可道時時思一見
如垢久不澡我來正清秋令人豁懷抱秋色佳有餘俗客跡如掃
佳哉二三友在席每傾倒杖策窮縈回高絕須一到幽尋不厭倦
遇境卽窮討階前千歲松閱盡眾木槁亭下百尺井空傳天眼老
陸子賞遺味至今泉浩浩高僧挂衣去誰識衣中寶九淵深非龍

徒見腓百草眾泉失蹊徑迸散不可考世事每如此所合輒顛倒
夜深山色清更對冰輪皓林柏影參差水中交荇藻廻櫂臧波心
如在蓬瀛島舉觴望青天醉鄉得深造茲遊須再嗣萬事殊未保

張公爽墓芝

并序

鄒浩

錫山居士張公爽廬墓側有芝三本生焉繪以爲圖見者咨歎
此芝初無根生自孝誠裏孝哉本於誠非緣利心起無芝非所作
有芝非所喜不期芝有無秀出乃如此養志勤色難送終極哀毀
既葬不忍歸結廬獨留止孺慕秋復春淚接九泉水比鄰或未知
天已知之矣因芝示邦人邦人爭贊美會逢當路賢薦此八行始

遊善權寺

程俱

放舟荆溪上溪水清且徐雲中離墨山慘淡初有無捨舟並松蘿
下直浮屠居竭來東軒上爽氣已有餘飛來定何年無乃與此俱
奔流漱庭下比竹梁寒渠山深絕凡境物物清以臞蕭森倚巖秀
天矯懸崖枯幽禽發寒唳響振高林疏我行亦良苦卻步計已迂
解衣卧清晝慰我千里劬予自衢來姑蘇省女兒竟欲歸卻行二
百七十里訪江仲嘉於宜興故有卻步
之句

善權洞

程俱

嘗聞包山境中有林屋天旁通號地脈嶽瀆潛鉤連茲山豈其類
頽洞皆中穿二岩岌山足琤淙激奔泉牛羊走大石吐受無窮年
金堂下石液雪積如烹煎從來米鹽稱浪播俚俗傳一洞啟山腹

穹隆亦聯綿誰題九斗字大篆仍深鑄中藏丈五石屹若龍騰淵
回頭問主人謂仲嘉我輩定不凡云何逐官牒常得我所耽向來共
幽討九鎖藏芝巖而我自林屋翩然遊皖瀟洪崖儻可撫不在南
山南

白馬洞

程俱

披榛不知疲詰屈巖下路俄然見深窅偶步入巖戶一泓窈而澄
百步清以驚人言紫髯仙白馬從此度磷磷盡赤石丹竈遺萍汙
收藏已兒啼效速勝麻護因知世盲聾荒怪雜疑誤虛空如許大
長嘯可平步胡爲萬山底躑躅向煙霧

神魚泓是日與諸公流杯中如西邱故事 程俱

柳州固奇士戲好亦幽絕遠懷西邱飲千古清興發徜徉恨無所
盤俎對羈紲聊爲五里行邂逅一壺挈神魚伏山根渟湛初一穴
侵侵決寒溜沙石助清越披莎得盤石離坐若天設寶觴競乘流
眩轉亦飄瞥爭持或三酌遇坎時一蹶歡來朱碧亂笑罷巾帽脫
相望西邱遊詎易議優劣

張公洞

程俱

昔年京江夜飛夢投雲山仍追謫仙老嘯詠層崖巔左盼俯無地
蒼巒生紫烟當時賦幽賞妙境竟莫宣今我來自東扶橈漾荆川
飽聞張公洞怪絕駭所傳聊從二三子一結青山緣北靈敞奇觀
下臨壺中天恍然驚昨夢了了墮我前仄徑緣危棧重屬護靈淵

奇礪玄坡倚側洞時鉤穿初疑天台聚納此一室間夸娥運神化
不隘亦不顛又疑清都客翩然下雲輶幢旒儼行立導從森蟬聯
丹梯香霧溼玉室珠璣懸撐虛一柱屹戴重三能驚鉛龜久已冷
青黥那可鞭香壇望八景東晨開五便坡陀忽度險宛轉漫無邊
或深如列厦或迤纔容肩高躋乍捫頂僞步欲墊泉不知行遠近
一步目九遷噫嘻此天設端在太古先恨無少陵手寫之黃絹篇
聊書夢中夢投筆一粲然

借居毘陵東門四首

程俱

客去不能寐翛然清夜闌樓居俯長川仰視天宇寬長川濯雲漢
錯落星宿寒青燈故可親且還對塵編其人骨已朽千載與我言

掩卷三太息虛簷清露溥

急景不可挽吾生豈無涯吳中十年舊鬢鬢亦已華嗟我壯且老
方知失林鴉欲歸巷無廬欲駕塗無車而子亦羈滯心事如蓬麻
人生無巧拙命爾將如何

吳中十年舊
謂傅冲益

猗猗隔河樹羃羃緣堦草時當長養候顏色豈不好萌芒忽柯葉
茂大旋枯槁滔滔不自知但見壯而老人生亦草木萬化迭侵擾
朱顏日夜變素抱豈自保

借居臨官道堂陰俯長河前車接來軫後棹紛相摩我獨居其間
超然嘯而歌頗從故人語安用高軒過旁有五畝園不知主誰何
時能曳屣往豈異吾山阿

視汾題悟空寺

陳剛中

暨陽古澤國今歲仍大水舟行民田中一浪四十里農夫相對泣
父子饑欲死酷吏亦何心誅求殊未已豈緊竭膏血直欲剝膚體
哀此無告民有生皆赤子天災日流行助虐亦何理我愧才術疏
陸陸佐小壘熟視不能救有淚空自灑皇心念下民惻怛形詔旨
王言既諄復象魏幾黃紙要須盡捐除仰稱德意美人微言或棄
歸休從此始

題定山梵放軒

胡理

道人避世氛山腰著祇園千夫斲青冥豁達窗戶拳鬼神間施設
儼護龍象筵法鼓空中鳴龍卧層崖巔幽靈駭今昔異事樵夫傳

眷茲水雲侶精賞託妙緣努力辦已事追駕佛祖肩憑高發鐘磬
梵音落諸天況時解禪縛超遙倚層軒放意萬物外目送孤鴻翩

遊張公洞

并序

尤袤

舟次湖汊侍季父伯兄游洞靈步行五里夾道皆喬木參天鶴
巢其上若笑若咳澗水漑漑鳴聲甚悲殆不類人間也入洞靈
宮覽前賢留題徘徊久之山石徑里許達於洞洞深數十丈磴
道險絕俯僂僅可下下寬廣容數百人大石離立或下聳欲落
若劒盾矛戟相撐拄或疊棟連地崛起而不斷若虎豹蹲伏仰
踞而擎攫中有小門持炬乃得入丹竈井曰在焉山石罅而上
皆奇石怪形無窮其狀旁行屈曲蓋深遠不可到其陽有懸崖

滴乳水流澗谷乍細乍大自成宮商橫澗得小閣可想朱藤纏
絡崖上丹花簌簌下墜芬芳襲人毛髮凜然欲少留而大風作
遂歸余遊山川多矣茲遊最可紀因成五百字貽我同志以備
他日觀覽焉

吾聞荆溪南有地仙所宅十年勞夢想今日著腳歷扁舟下湖汭
水漲沒砂磧結纜小橋旁杖藜從所適平岡面陂陀疊嶂堆殘積
行行三兩里夾道喬木植其木幾合抱其高乃千尺風生萬壑響
日照四山赤時搖樹林杪忽見屋宇脊宮門何崢嶸古道頗修直
長廊景曠曠崩殿人寂寂寥落昔賢題摩挲壁間墨捫蘿上層巔
俯瞰得深窟危梯交枝撐鳥道穿詰屈投身乍寬縱跼步仍逼窄

攀援愁顛儕傲睨驚險僻懸崖采頽頽亂石拱劒戟白雲何時橫
乳溢或自滴中空正瀕洞了不見天隙冥行迷近遠僂猶撻墮
巉巖豈人工隱軫入地祗窮幽或篝火俯跪僅容席仙壇尙故處
丹竈儼遺跡山蟲鳴啾啾野鼠聲噴噴傳聞老父語以往深莫測
中有白玉堂橫絕巨石塞榜連洞庭野欲去不可極潛窺目先旋
縱走膝無力迢迢步仄徑突兀出峭壁樅楓高枝樛藤蔓青陰冪
芳草何芊綿丹花亦狼藉躊躇古亭上頽仰幽澗碧丁當下流水
磊塊欲落石雖云培塿高氣與高華敵其南有空穴澹灝殷幽黑
陰風呀呀吐冷氣森噴逼蛟龍久藏伏金玉閤簡冊靈蹤信茫昧
幻怪紛慘戚將無神物守欲與世壤隔平生邱壑念蚤歲泉石癖

豈不思三山所恨無六闕樂哉茲辰遊逸興潛有激仙翁在何許
綠髮尙如昔髣髴笙簫聲徘徊鸛鶴翼俗緣磨不盡夢境坐形役
何階染衡茅幽討窮日夕風雲西北起天地忽改色倉皇促歸旆
造物豈戲劇良遊易乖忤真賞難再得寄語山中人重來儻相識

憩懷古堂

楊萬里

新葺懷古堂舊臨郭璞池去歲夏徂秋無日不此嬉茨菇無暑性
芙蕖有涼姿今年池水乾老子來遂稀豈惟來不留亦復去靡思
朝來偶一到又覺景物奇水含露後光荷於風處欹便有白鷗下
驚起翠羽飛方池濫窗東長池橫簷西紅綠向背看腸詠朝夕宜
此堂初無情此池諒何知如何涉斯世乖逢亦有時

曉自銀林至東瀾登舟寄宣城親戚

范成大

曉山障望眼脈脈紫翠橫澄江已不見況乃江上城結束治野裝
木末浮三星羸馬隴頭嘶小車谷中鳴亭亭東瀾樹練練綠浦明
篙師笑迎我新漲沒蘋汀徑投一葉去雲水相與平聊將塵土面
照此玻璃清懷我二三友高堂晨欲興風細桐葉墮露濃荷蓋傾
凝香繞燕几安知路傍情

送邱宗卿博士出守嘉禾

呂祖謙

構李國西門道里去天咫訟庭人摩肩客館舟銜尾涼燠變須臾
風俗殊駭視心平理自見周道本如砥堂下萬休戚堂上一笑嚬
是心苟不存對面越與秦豚魚尚可孚況此能言民君看津頭柳

菜皆相親奮髯疾抵几解衣徐探雛古來多快士氣吞兩輪朱
簿書高沒人迎箴風摧枯自許豈不豪歲晏終何如

夏港僧舍

魏了翁

迅商呼不來午汗如翻漿道人空萬緣邂逅贊公房虛空千世界
圓滿一盞囊碧雲護兜率白日耀普光蕭蕭蘆葦中著此清淨坊
鑒師從西來一喝登慈航唾手舉慧刃斫斷煩惱韁邀我供煮餅
心地陡清涼官焙破蒼壁桃笙漲寒江從師問究竟室西照殘陽

夏港僧舍次魏了翁韻

許奕

暑秋風觸懷如病渴得漿綠英解人意招我眠僧房京華飽塵夢
不到古錦囊出門天地寬弄此山水光條然三間茅如坐七寶坊

短簷接烟稻疏籬度飛航須臾海潮急萬馬不受韁壯心八極表
卻扇坐晚涼峨眉秀連娟萬里同一江欲駕海雲去小窗轉斜陽

季子廟

周馳

古人不可及冥晦秉淳德一動成功名煥爛照無極季子賢大夫
飭佩遊上國微乎禮樂意洞達有精識迄今二千年欲繼難再得
我行故城闕寂寞弔遺跡廟古丹青漫階空苔蘚積翔禽集中霄
懸網挂虛壁鄉人尙加敬瞻仰自夙昔歲時脩饋祀塵土走巫覡
吾從志爲學不肯競朝夕景暮將何如江海起涓滴

遊白龍山

蔣靜

駐馬白龍潭拂石青松下雲從潭底生風向松枝灑風雲了無心

聊隨白馬化勿謂雲風擾中含閑暇者

銅官山

蔣捷

萃律荆南山袁令葬其麓相傳天賜棺咄咄誑流俗令嘗成輿梁
天報宜以福賜棺信榮矣畢竟入鬼錄珠官在嶺南錦官在川蜀
鹽官與鐵官登載紛簡牘吾恐古有司鑄銅山之足後人譌承謫
官旁妄加木政須改銅官大字鑱厓腹事有作俑者併案王喬獄

題季子墓

元白珽

聖人如日月下照無黨私藏珠與韞玉所得自華滋恭惟吳季子
夙稟明睿姿近取子臧節遠紹泰伯基兩以大國讓廉風起蠻夷
觀樂義已燭挂劍心如飴時方尙詐力子獨恪且祗時方事寇攘

子獨甘棄遺孔子不到吳聞風重齋咨佳城介申浦采地亦在茲
特書寄餘哀豈不遐爾思蜿蜿龍蛇翥皎皎星日垂萬世懷道義
取舍實繫之寄言邦之人無但覲首悲

題斬蛟橋

白珽

桓桓周將軍英烈照千祀少年知自艾成仁不惜死射虎下終南
祈潛北橋底騰拏三日夜憑血四千里激波爲嶽立揮刃電亦駛
想當批鱗初見義不見水及其立人朝矯矯中不倚文學旣英發
武事復靈起纖兒善醜正甘作忠義鬼至今有生氣耿耿耀青史
蘇公百世豪氣味有相似泊舟蛟川下洗石題所以平生疾惡意
十有二言裏豐碑刻祠宇詞翰晉二美二美固足珍吾取不在是

遊竹塢四首

馮子振

劉侯將相家攜客晚相過爲言馬跡山詩屋竹千箇清心鈕君子
萬卷留四座何言挺特姿隻舸堪捩柁毘陵如此懽令我春夢破
齋菴幾時來小獵鹿茸草傳聞好事人舟泊門已掃笑談傾家釀
鄰甕亦傾倒輕風浮玉天何必問三泖海鰲猶堪把洞壑恣幽討
太湖光爛銀日上眩朝彩幽人住此中浩蕩增磊砢亦有千橘林
柯葉霜不改神仙留丹竈五色精瑣瑣我欲從之遊芝田爲君采
環湖皆是山岸岸鷗鷺浴煙嵐浮溼翠盡日看不足結廬總忘機
開卷抽畫軸四時樓閣倚人境非世俗悠哉東湖春此客面已熟

梁谿謠贈盛高霞道士

柳貫

梁谿一片月搖蕩綠蘿煙玉女采珠回駕龍耕壁田春去竹花實
歲深芝草駢鳳凰招不下遲景惜留連卻望白雲嶠明星正當天
雲中青童君招麾使之前謂言寶訣書列在瑤臺編豈尤守扁鑰
一閱三千年至今海嶽間光氣常蜿蜒茅龍亦解飛金匱豈徒堅
引手探玄策得之可登仙首路向恒碣西窺臨嶽蓮天壇見日出
皓鶴共蹁躚行攀飛狐塞回薄扶桑淵滄溟挹不滿石廩小如拳
還尋屏風疊鼓枻陵中川調笑呼陸羽濯纓第二泉但聞丹齊成
不見朱顏遷顛露薦承液雄虹爲采旛上下八景中竄然觀化先
何必肩洪崖遂將儕俚伶寧能獨不死爲我啟真詮大還容草創
小劫度沈綿桂枝倘堪結遲贈遠遊篇

次韻毘陵吳寅夫見寄

陳旅

季子江海居勝友園池賞臨水咏新詩輕颺送流響丹花陽林吐
綺翼幽林上雲瀾阻塵躅離思徒浩漭杪秋辭京邑寒郭艤吳榜
宗兄念行役旨酒勞鞅掌承子其清悰論文發豪爽我翁久倚樓
所至類樂廣願得陽羨田甯慚五湖長夙昔詒約言遲暮嬰世網
服仙諒逍遙樓觀滿方丈餘霞散文席斜月生翠幌芳夕令人思
思之不能往晨興卽高岡引睇寫孤想

雙梧歌挽王庫使

逢之
父

俞遠

客行天下半波流口滔滔卓然王幙長獨詣見所操西風吹黃鵠
瞥眼雲中翱無彼升天翼欲飛詎能高讀律三十年弗離州縣勞

歸休青山郭緣溪置屋牢種瓜以爲業不復求其曹饌甘盤有魚
飲旨尊有醪兒賢曲奉養未暮樂陶陶奈何百年期懽忻變號眺
望見雙梧樹我每涕沾袍梧樹奚足悲迴謁於焉韜

遊惠山寺

鄭元祐

百里盡平壤茲山忽中蟠
豁得宏深紆徐納平寬
僧坊隱其腹崇構居桓桓
立神衛觚稜綠雲置闌干
我來玄冬交榜舟起微瀾
天連黃沙白露委青林
丹地無車馬塵松筠正堅
完蒼然後凋意彼此不厭
看稍稍涉其厓探源汲甘
寒恭惟桑苧翁出處良獨
難帝青九萬里冥飛見修
翰空留雪泥跡莫究清淨
觀煮茗滌煩暑晏然有餘
歡

題鄒忠公墓

陳 肅

鳳凰喚朝陽和鳴太平瑞百鳥從喧嗽葳蕤赤霄逝昔者鄒忠公
天質蘊純粹茗華玉樹春秀映層城麗融貫河南學會要慎獨際
出身職俎豆淮潁風流思臧否謚法解饗諤補衮議君王正年少
恩愛競陳衛長門生秋草寂寞金屋閉時聞昭陽間車音雜歌吹
朝方降鴻冊莫已奏封事宛轉陳正始社稷宗廟計權臣肆讒毒
抵罪竄荒裔蘆簫送銅鼓笑語見魑魅泰陵嘶石馬明堂更寶位
徘徊趨魏闕感激俯宸陛至尊重歎獎再俾司獻替簡嚴起居作
宏雅絲綸製戎曹羽書靜銓部瓌材萃嵯峨蓬萊閣日月近清祕
一麾出江左慷慨懷古意長嘯新亭賞爽挹龍虎氣菱香藕花淨

畫舫西湖艤遂爲禹穴遊復上越臺悲安知鼎焚稟茲乃致姦僞
湘流湛凝碧衡嶽鬱積翠豈無鄰酒美憂國不成醉南過蒼梧野
陳祠有虞帝回首九疑雲潛然爲悲涕及承內遷命沈疴困炎癘
首邱竟落落衰贈中興惠唯餘孤墳在歲久盡頽廢荆棘何榛榛
白楊亦翳翳卓哉謝君子衰俗振高誼惟賴賢郡守率眾共營置
周垣龜甲齊修表螭頭偉銀榜倒薤題琰刻逸藻記庶幾永終古
凱式於後世

春日雲林齋居

饒介之云堂扁雲林二字雲字摹天台白雲寺額林字摹廬山東林寺額皆右軍得意筆

也

倪瓚

池泉春漲深逕苔夕陰滿諷咏紫霞篇馳情華陽館晴嵐拂書幌

飛花浮茗盃階下松粉黃窗間雲氣暖石梁蘿薦垂翳翳行蹤斷

非與世相違冥棲久忘返

此詩集中又載改本云臨池春流駛掃地夕陰滿正襟味道言迢迢坐溪館嵐

嶺當書榻煩襟一舒散靡靡松花黃迢迢雲氣暖石梁青苔冷於焉人迹斷故非與世疏冥栖遂忘返元音所載卽此

與張貞居雲林館宴集分韻得春字

倪瓚

青苔網庭除曠然無俗塵依微樵路接曲密農圃鄰鳴禽已變夏
疏花尙駐春坐對盈尊酒欣從心所親

贈天甯福上人

倪瓚

荆溪霜落後銅官日出初自櫺頭上髮更理篋中書上人從定起
咏言方繞除解后發微笑幻身同太虛

夜泊芙蓉洲走筆寄張鍊師

倪瓚

芙蓉猶滿渚疏桐已殞霜泊舟菰蒲中吳山隱微陽因懷靜默士
竹林閔玄房煮茗汲寒澗燒丹生夜光憶與鄭郊輩閒咏步修廊
時子有所適顧瞻重尙羊庭下生苔蘚牖間繙詩章奕勢鄭老勝
酒榼郊生將雅歌雜詠諧列坐飛羽觴子歸日已晚棗栗亦傾筐
揮手輒謝別莫宿荒城傍遲明趨所期待子鄭公堂晨往遂至昏
企望徒悵悵乃嗟仙真馭固非世所望惻惻理歸櫂泛泛秋浦長
還尋甫里陸更醉山陰王素冠斯馳贈喜知終未忘余茲將遠適
旅泊猶彷徨微風動虛碧初月照石梁曠望對清景賦詩託陳郎
茯苓思同煮夜雨共匡牀

玄文館讀書

并序

倪瓚

玄中真師在錫山東郭門立靜舍號玄文館幽虛敞朗可以閑
處至順壬申歲六月余處是兼旬謝絕塵事遊心澹泊清晨櫛
沐竟遂終日與古書古人相對形忘道接翛然自得也又西神
山下有好流水味甚甘冽與常水異館去西神山遠不出五里
故得朝夕取水以資茗荈之事居茲館讀書研道之暇時飲水
自樂焉乃賦詩曰

真館何沈沈寥廓神明居陽庭肅宏敞丹林鬱扶疏
瞻言茲遊息脫屣榮利區檐楹初日麗池臺涼雨餘
焚香破幽寂飲水聊舒徐潛心觀道妙諷咏古人書
懷澄心自怡意愜理無虛誰云黃虞遠泊然天地初
回首撫八荒紛攘蚍蜉如願從逍遙遊何許崑崙墟

故東流尹陳公挽詞并序

王逢

公諱文杰字漢卿號默齋毘陵人也父業醫母張憐其好學每
質簪珥奉師會宜興鉅室蔣竹徑病公侍父往就留其塾卒業
久之客有寓公過蔣一見納爲友寓公赴浙憲使遂薦授慶元
儒學正室則浙東帥重之俾二子從二子挾貴胄無弟子禮又
羣蒼頭臂鷹鷂日躑躅無度公麾蒼頭去弗聽乃扑教二子曰
吾授堂帖一通班官耳義猶受天子命天子有聖旨諸王駙馬
不得漫學校汝敢是乎因奪一大鷹縱之蒼頭走白其帥帥怒
喚公眾爲公懼止之公曰吾有聖旨在竟往帥詰曰縱鷹有之
乎公曰鷹不縱帥有罪具言云云帥竦立曰是愛我也遣蒼頭

出謝仍護公歸既辟爲其掾一郡大驚滿考除本學教授再辟
掾淮東陞兩浙運司知事丁母艱服闋改江陰知事三載擢東
流尹推贈父宜興判官母宜人卽謝病歸逾年卒壽六十九先
是公長郡幕里人殷數請託先君拒絕之殷銜恨誣行賂告分
憲屬公逮繫公復憲官曰典史王某者清謹人也杰交其子逢
亦未始識一面萬萬無是事惟體察之憲官遽公言獨不問後
逢見公於家無一言及之其平生行義率類此公負詩名監丞
陳公旅以兄弟禮最親善嘗誌其母宜人墓子在有文學遭亂
憂悸死孫一

東流家本醫少貧困闔伍賣藥粗給身力學忍刺股祖瑩良苦志

黃憲早稱許參朮收狄籠芝蘭羞謝墅繡衣驄馬郎遂有茂才舉
尋典四明教弦誦喧兩廡元帥勛舊臣遣兒受訓詁其奴臂鷹鷂
躡躡聖宮宇毅然掣錦條麾去莫敢侮同舍爲公懼公且白大府
帥歎禮遇加擢掾器三語再遷東淮閩參贊妙材謂郗超幕兩登
單父琴一鼓先塋罷焚黃長嘯卽解組桑榆晚留景奄忽悴風雨
送喪阻范式能詩失阮瑀憶昔忘年交瓦缶視鍾呂虞揭歐黃輩
恨不與披覩閒話良天時益燥罄餘緒況於魯連義歷歷在肺腑
遺孤喪亂中揆分台予撫嗚呼同漂零清秋益愁楚

故空谷俞先生挽詞

并序

王逢

先生諱遠字之近號空谷江陰鳳歌鄉人也其先儒起家至先

生貧隱居教授能行古道毘陵孫帖以先世舊依先生待如新
知卒殯焉頃年疫備奴病乞歸先生曰慎毋疑疫氣相染其善
調護踰旬死時兵興山林盡赭人死多委之壑或以是請先生
曰生盡其力死棄之溝中不義也單出爲棺窆歲暮春里民舁
木偶神遨井落間至先生門適所舁重而止舁夫告家姥曰神
靈報施影響捷宜急祭燎旗下否則殃及矣姥笑曰木偶何能
爲主人歸吾家爨下物耳眾愕哈去族姪裕親歿有佛者以佛
事爲解裕毅然曰吾諸父嘗謂形神旣離地獄何有今乃自誣
親有罪不孝孰甚佛者慙而退其善行及人率類此先生骨貌
清卓類有道者長於古文尤嗜詩亂中吟詠不輟嘗自叙詩曰

蟲之薨薨鳥之嚶嚶機動籟鳴豈得已而不已乎不得已乎耳
於以見其出乎性也壽七十二子樵孫庠序

空谷俞先生言行慥慥爾襄陽一耆舊東魯古君子奕葉蘭桂芳
晚見長松倚野鶴夕警露天雞晴影水神清凝高寒眼碧照烏几
州閭薰善良土俗變淳美削跡門徒僧罷迎藥祠鬼貧交有孫時
推食養沒齒義聲及耕奴亦免溝壑委遭亂接浙行帶索並萑簞
兒樵性至孝承順若居里先生但微吟落句益奇詭玄洲摘芝秀
翠嶽決石髓成瞻星應庚忽夢歲在己枯羽鏃礪道蠹勿甚提耳
忘年感孔融赴弔愧徐穉霜晨高鴻邁獨櫂五湖淚爲歌雙梧歌
先生挽
先君作林哀朔風起

遊鯉山

山舊名
山里

王逢

鄉山三十三遊鯉莫郊南巖然獨高大秀擗東諸嵐土剛蓄炎精
厓仄削劒鐔我嘗挹飛翠遠在滄江潭波濤與伏興雲霧相吐含
恍然穆王駕八駿左右騁又如琴高仙腳踏朝蔚藍久思更徽號
新喜遂幽探太白賦九華後來成美談狂歌繼其武林澗免愧慚
春風綠瑤草秋霜紅石楠行將修月斤爲鑿避世龕蛟龍正格鬪
鯢化誰其堪

馬大沙館舍病後留別陳氏昆季三首

王逢

口腳浸深江暮色先著樹回風戀叢薄幽響不暫駐羈人臥齋館
壹鬱秋已度十日江之南一飯屢外顧冥冥烏頭白眇眇鶴髮素

夜久蛟龍移沙洲莽煙霧

開門風欲來眾木斂寒色蔓草緣歧路零露秋向白千金生戚醺
斗祿疲形役倏同草木腐何有名教益參伐挂簷間絡緯秋四壁
兀坐燈復親孤光委今夕

天空無纖雲銀漢鏡面瀉芒星煜煜動霜氣橫萬瓦尋常恨伊威
蟋蟀北牖下青熒樵爨火黃落墻垣野絺綌淒以風刀尺念當把
家山限一水杭輦不待假薄田庶有秋雞酒會鄰社

席帽山先壟圖詩

王逢

山本黃山東峯之別名距江陰城北六里與馬鞍山相屬曾祖
昌誼先生大父潛昭居士大母徐氏先君庫使妣李氏

諱靖墓

東西相望焉至正乙未冬不肖逢不幸避亂於外寢五年矣顧
烽烟遼隔不得以時祭掃因託江東提學睢陽朱澤民爲圖江
浙分省郎中天台陳基爲序仍自賦一章示兒掖攝拊用永其
孝思焉

春林烏鳥啼墓上開棠梨清明寒食近子孫各提攜行行黃山道
山光明素縞鬱炙奠酒漿羅泣紛拜掃幸得緩緩歸及此風日好
頻年喪亂苦莫甚我鄉土連村十萬戶存者僅可數石羊石馬羣
亦已臥榛莽於乎我先塋目斷魂魄聚木落氣返根天寒水歸源
豹死義首山狐死首邱原汝曹昧斯理苟全奚足論作歌興孝思
不繫圖畫存

三貞篇寄納麟哈刺參政幕下僚友

王逢

梧西女陳氏顏色絕勝玉阿耶燈窗下古傳常暗讀義須嫁官人
麻桌心所足兵麾忽東指烽火蔓平陸魚鼈遭顛連雞狗同追逐
契榆哆其口反噬机上肉母子泣相誓甯死不汝辱春輝黯門楣
寒日照鬼錄皇天實鑒臨家廟爲慘肅陳氏母曾宋直講壻婦惠確之七世孫女
吳俱亦在難自判受命獨臂血濺賊衽賊歎爲斂縮差差白刃間
偉節驚耳目荒野雲雪暮緬想會深竹水流風悲鳴星迸萬羽鏃
回首陷沒地何限委溝瀆大參行當來卹典具簡牘前湖百世祀
謂五代時烈女何氏明妝儼車服從以雙素鸞配享疇敢黷孤蓬任漂轉餘
齒寄草木倡茲三貞篇庶用矯浮俗

往揚名開化二鄉掩骼

王逢

分藩多賢勞不敏忝賓客雖無官守靡亦復與言責二鄉虔劉禍
慘甚長平厄先王制禮經孟春當掩骼僕夫有難色款段纔任策
駸駸度岡坂眇眇循藪澤稍稍烟微青厯厯野四白游魂行草上
遺老候道側我豈物役徒茲來出心臆皇天久下憫赤子非寇敵
鴟鳥何不仁銜啄血更瀝因歌戰城南風悲淚狼籍

義僧行

王逢

世降道淪喪盛事罕見之我歌義僧行斬取國士知僧臻生夏浦
俗號徐大師勇敢重意氣赤手可獵麋張忠郭解流任俠不計貲
臻願出門下致死誓不移盜尋寇馬洲魚肉乎蒸黎元戎堅營壁

大姓深溝池壯哉張父子分率脫項兒父擒子死難家不得斂屍
臻聞切齒恨恨死不同時夜卽操斧刀奮身斫藩籬徑入牛宮內
斧斷張縶維手殺盜六人力挽問道歸妻孥拜堂下金幣謝所私
上公賜巾裳欲以好爵縻幡然掉臂辭還山弄摩尼方今國步艱
中外罹瘡痍銅虎盡懸綬鐵馬誰舉旗嗟爾匹夫臻足張三軍威
何不食君祿爲君靖淮夷收名魯仲連千載爲等期天秋黃葉脫
日暮玄雲馳歌詩節鼓吹用壯吾熊羆

義鄧

王逢

吾鄉有鄧添千里負主骨晨夜竄草間宛轉皆虜窟胼胝苦何辭
性命間一髮日車皆濕履虬蟄或抱月魂氣相衝塘鳥獸亦猶狘

經過百戰地青春暗消歇深幸主有靈全生及城闕主母悲喜集
流淚心激越主妾事他人空庭自花發主昔爲龍蛇公論不可沒
但感衣食恩疎戚均賞罰在家爲義奴在軍爲義卒庶幾銜土烏
尙愧擊蛇鵠淒淒薦霜露暫暫上參伐不見秦舞陽悲風動天鉞

馬洲望孤山

王逢

海門窺長江鉅浸天浩淼山根纏坤軸百里見孤杪風披陰霾晝
露灑石黛曉龍來蒼林涇鶴舞白浪杳居然蔽中洲隱若壓外徼
幽貞水仙態軒特國士表時時降天人旌旆光縹緲予將展高步
兵氣秋見兆嚴霜草不殺悵望翠清悄浮雲非無蒂薄暮心裊裊

楊子舟中望鷲鼻山時聞黔南消息

王逢

山環芙蓉城私怪鷲鼻狀奔濤鎖長薄大石山名凜相抗勢雄千軍
壘氣敗萬鍾藏草樹春不蕃莓苔滑難傍剛風過靈雨復值桃花
漲破暝鷗鷺盤乘陰龍魚王颿鼓一葦間攬之膽增壯謝安晉元
臣豈跼江海量蒼生方顛連其敢遂疎放黔陽百粵地黃霧吹虎
輶再觀神秀姿不止西北向惇惇蒼精出閃閃白月漾三叫馮夷
宮吾奚獨惆悵

周處讀書臺

王逢

偶遊鹿苑寺遂登孝侯臺當時斬蛟虎折節事賢材詩書夜繼日
奧義旋兼該篝燈委紅炮挂劒蝕青苔默語三十篇若出造化裁
純誠被幽魄勁氣懾上台翹翹母望深急急將命催孟明哭蹇叔

手跡死孔惺天不卹忠良寧馨眞禍胎吾儕千載下野衲相徘徊
秋原風藿慘夕殿薌花開白馬從素車恍渡秦淮來故都凡幾姓
醜地餘劫灰此臺異呼鷹靈光其崔嵬私傷過英武不得盡奇才
長廣溪漁翁頌吾祖德感慕成詩

華幼武

移舟遡春水飄搖任所適直汎長廣溪冷然洗塵迹前峯雨初竟
空翠若可挹輕波盪晴景洗瀆閃金碧鷗鷺不驚飛鳬鷺自浮沒
浩歌放中流俛仰天地窄顧我塵俗姿何有山水癖溪南見漁舍
茅茨半欹側參差數株柳青蔭稍蒙冪繫纜柳樹根褰衣坐磐石
漁父向我笑愉悅好顏色問我從何來言語若舊識所居只尺地
三世無改易昔者盜賊至蘆葦避鋒鏑今年八十餘頗覺少筋力

長年生理處繞舍菱芡實南風吹荷花清香滿吾室窮冬不知寒
曝背向白日膝下有長男夫婦亡疾疫細女寡少年守志奉朝夕
一孫與一甥網罟供衣食此心百不縈棺木具已畢我憶年少時
曾上君子宅重門使人迷若與塵境隔近聞車馬過烽火成瓦礫
尙念處士翁四方頌遺德我種君家田往往受惠澤斯人久云歿
斯德猶記憶常時語兒女欲報意罔極斂袂聞此言惻爾潛歎息
人生宇宙內繁華竟無益富貴榮一時草露朝淅瀝何如養方寸
仁愛布民物流芳施孫子百世仰憲則我祖不可見我心竟慘慼
回首故園春潸然淚沾臆

桃溪泛舟尋方厓士玄

周砥

放舟千山裏嵐氣滿晴川歌辭理白雪水禽栖綠烟蒼蒼野陰變
蕭蕭風景妍尋僧轉回塘望雲極遙天萬事甯有素一行忻偶然

同賦

馬治

舟行沙岸曲隱見遠人村初罷桃溪雨寒山蒼翠繁薄雲凝遐思
微風吹古原登稼已云樂欣欣田父言予心亦何事訪舊試尋源

龍巖

馬治

幽幽千仞巖湛湛百尺潭龍臥既深黑鳥飛亦清涵遠哉齊梁間
剎宮徧東南茲山實靈異殿閣何訑訑仙蹤遺篆籀古天開鬱藍
洞門閤石室垂藤映珠龜日出林更靜雨餘泉益甘聊從荷蕢者
一對名僧談

竹菌

馬治

菌生陽林下戢戢春雨餘不遇樵人識何以謂嘉蔬凌晨渡山澗
見此步躊躇散漫盈我前落花覆沮洳丹霞冠其頂映竹彩雲如
俯拾喜輕鬆徐行執吾裾傾身試湯鼎紅皺未能舒柔滑無與俱
登筵鄙七菹雖悲暫時物一使腥風除

晨詣祥符寺

明劉基

入谷雞始鳴到寺鐘未歇草際起微風林端淡斜月僧房湛幽寂
假寐待明發松徑斷無人經聲在清樾

題王允岡山齋

宋濂

園人宅一區卜築在陽羨銅官壘蒼翠白雲遞隱見溪水抱村流

觸石成洞漩鶴巢古松枝魚咬殘花片清景樂高閒雅情任狂狷
山林足肥遯軒車忘慕戀心靜養長年世榮倏驚電寄言謝逋客
重修逸民傳

過白鶴溪

高啟

昨發白鷺洲今過白鶴溪溪流幾回轉只在晉陵西月出女猶浣
雲深猿自嘯茅峯雖咫尺無計躡高梯

題倪雲林所畫義興山水圖

高啟

嘗吸陽羨茗不遊陽羨山銅官結秀色都在畫圖間樊川醉遊處
水榭依沙樹雲入縣城來谿流太湖去我愛雲林生高歌無俗情
石庭梅欲發須放酒船行

贈惠山醫僧東山

高啟

九峯聚錫麓一水回梁谿之子修淨業長年此幽棲曲彈白雪妙
詩吟碧雲低況有醫龍方丹成重刀圭採藥夜歸院蘿月照澗西
扁舟欲相訪愁作武陵迷

贈毘陵逸人黃本中

林鴻

大道如砥平我車不方軌明時世景清夫子乃蓬累有客天上來
爲說黃金臺所市旣駿骨所羈乃龍媒五月上武陽炎風焚大荒
豈伊道路難欲往河無梁篳門逢君子酣歌日中市披髮行且吟
時人盡驚異旣知歸日落欲往秋風作誰同甯子歎且效榮叟樂
離別遠將歸涼風吹布衣南風有鴻雁毋使信音稀

過鄒道鄉先生墓有感

謝應芳

忠公天下士夙學能慎獨平生寸心赤耿耿照黃屋元符引裾諫
痛甚賈生哭上言正中宮下言斥當軸直道時不容除名竄荒服
建中及崇甯寵辱手番覆炎蒸嶺南地文章散清馥晚歲歸故山
林莊竟靈玉向來望佳城鬱鬱暗松竹今爲禾黍區春雨耕穀棘
翁仲知何歸雲仍困無告嗟余佔畢生斯文賴私淑願言理侵疆
重植冢上木愚公將移山自謂計已熟精衛欲填海可奈力不足
傷心復傷心殘碑臥荒麓

簡張希尹

謝應芳

余生寡諧俗老去得知已論交固云晚莫逆良可喜聯翩諸侯客

寂寞著書事夜分青藜光日竝烏皮几幾回論班馬一笑易亥豕
烟雲揮洒外風月吟嘯裏蚶杯酌流霞獸爐蒸沈水佳哉水調詞
清我塵俗耳朱弦聽者希白雪和能幾別來懷盍簪夢見承倒屣
帷林大江邊瓢茗橫山趾秋風響梧葉甘雨熟菰米相望不三舍
相過堪一葦詩筒繼元白通家猶孔李況於阿戎談亦與諸任齒
尙友古之人厥德薰晉鄙

邱氏節孝詩

謝應芳

君山削蒼珉江水清若空爾姝生其間山水秀所鍾八鸞鳴蹶里
桃李正春風楚楚繡羅襦娟娟玉芙蓉蒼黃走烟塵竟作秋霜蓬
浮苴樓海瑞賴有良人從良人遠永訣跪乳遺雨殮還家依二親

親舍四壁空，勉薪水役辛勤。機杼工十年，守孤鐙朝夕滫瀡俱。
廢居親所憐，苦志恐莫終。微言示鸞膠，慚憤而發紅鬢。髮落霜刃
誓言死，吳淞慈親乃噬臍。肝膽照秦銅，陵谷聿變改。故鄉歸路通，
扶攜還里居。失怙抱哀恫，復爲銜土烏。埋玉掩斧封，服勤奉慈闈。
愈久情愈隆，手和熊膽丸。課子學業攻，共姜柏舟後。志節誰與同，
德哉文定公。世澤源無窮。

江陰縣

韓奕

偶行江南岸，泊舟臨縣城。霜餘淞水盡，月上寒潮生。晚宿就人烟，
省俗詢遺氓。農商共云庶，頻年苦兵驚。茲方復舊業，生意稍經營。
民廬竹樹密，里巷雞犬鳴。地僻訟事簡，田寬官賦輕。況當更政始，

民生日以甯客次難久淹遨遊恣閑情就枕待明發歷歷疎鐘聲

眠雲軒

張適

山人賣藥還倦就山房寢白石作匡牀巖雲爲席枕於焉得晏休
屢貧澄夕景落月映虛白輕颺度微影洒洒毛髮清冉冉衣裳冷
無心同卷舒澤物共馳騁鶴鳴驚夢回蘿窗夜初永

賦得太伯廟送倪元鎮

袁凱

翦商肇基迹傳季思建聖兄弟逃荆蠻讓德一何盛千家聿來從
句吳始開境遙遙至裔孫欲大心愈騁深宮貯妖麗高臺瞰遐迥
旣拒伍胥忠還甘太宰佞鄰邦樹讐怨上國肆爭競社稷終變遷
軒楹獨完正相傳在閭里灑掃政嚴淨歲時具牲醴歌舞勞送迎

楚鬼入無食越魄誰將榮強暴有湮晦聖哲無終竟於焉送將歸
月魄得依並是時春氣和氤氲滿芳徑清花動幽彩汀蒲發深艷
江水去不息烟霞日將暝斂衣拜階下懷哉起孤詠

望惠山

王惟允

昔者歲庚戌承檄離故鄉遽與此山別關陝隔異方緬懷林壑姿
令人歸思長瀟灑栖白雲青松蔭石牀泠泠第二泉流潤石髓香
今辰罷官守春風促歸航青青九龍峯鬱然當我藏我本江海人
泉石有膏肓一從罽塵網鬢髮已蒼蒼寄謝桑苧翁卜鄰漪瀾堂

野翁山居

施廉

清晨梳我頭有客過茅宇呼兒具尊罍展席集朋侶鉤簾對青山

蕭蕭落疎雨可人期不來相思渺何許

春風亭次袁大尹韻

亭在縣治

沈暉

我登春風亭適此好天氣豈惟二難并亦喜四美備元化究終始
微言析同異況觀春容篇綽有風雅意一唱再三歎使我開壅蔽
辟如聞簫韶食肉不知味吁嗟去古遠大道日云敝詩書秦王火
禮法晉人棄兼愛賊吾仁爲我亂吾義睨視同室鬪門戶堅自閉
伐木傷友朋甘棠憫兄弟骨肉尙路人矧肯及殊類溥哉仁人澤
六合鈞覆被諒彼燕與雀安知鴻鵠志中牟感魯恭渤海仰龔遂
伊周雖聖賢馴致良亦易嗟余亦何幸交好從蚤歲所期在道德
豈直爲功利三江瀉詞源五嶽森筆勢醉後發狂歌吳箋爲君試

題橋頌帖後三首

徐顯卿

杜曲連青天峨眉甲震旦卒歲豈不得萬里卜陽羨緬懷兩公達
故鄉安足戀男兒志四方貴在適所願買田惟種秫卜築溪山半
仕宦有時止聊得耽荒宴

青天落白虹帶我西北樓長橋一何長千秋附周侯斬蛟入其窟
血濺神龍愁威聲振六合名與天壤侔我來登此橋清夜風颼颼
上有千古月下有千古流千古尙爲鄰一世安足儔俯仰百歲間
努力追前修

步出小東門流水何瀾瀾古人水中央水榭有遺址入門登高樓
青山暮成紫四顧山光中草木何韡韡云是杏花村當春爛桃李

謝公有別墅肯爲蒼生起

大潮山

項麟

峨嵋大潮山上有金仙廬廬傍構精舍迴與人境殊我嘗登絕頂
四顧心洒如澄湖眇一鏡君山麾太虛白雲忽飛來雅意如相娛
俯睇區中人營營在洪鑪舉觴酌金仙此樂誰與俱

碧鮮壇

卽碧鮮菴相傳
祝英臺讀書處

楊守陞

緹縈贖父刑木蘭替爺征婉嬋女兒質慷慨男兒情淳于不生男
木蘭無長兄事緣不得已乃留千載名英臺亦何事詭服違常經
班昭豈不學何必男兒朋貞女擇所歸必待六禮成苟焉徇同學
一死鴻毛輕悠悠稗官語有無不可徵有之甯不愧木蘭與緹縈

荒哉讀書壇宿草含春榮雙雙蝴蝶飛兩兩花枝橫彼美康節翁
小車花外行一笑拂衣去南山松柏青

石室

吳天璽問離墨山有空石長十餘丈曰石室孫皓嘗封禪以侈瑞應

傅瀚

石室下深曠其顛出高霞何年鬼斧鑿見此空豁衍壁間淨無塵
惟有蒼苔花白雲自封鑰徑竹相交加六合皆塊蘇冥柄竟誰家
閒來此游息亦足遺紛華無因一相訪飽識東陵瓜

泛芙蓉湖

劉大夏

鵲首翳雲芝雕舸入華渚蕭蕭涼風吹澹澹湖頭水遙遙凌太清
寂寂雙鳧起左右芙蓉披秋隄雜蘭茝白日狎滌洞輝輝若金甌
屏開兩岸明麗結千層綺雲帆自中流理楫憑舟子風靜水搖紅

影入清波裏歲月良不居流光復如駛樽罍旣無算浩歌且未已
介馬紛東馳伊人在中沚安得忻同濟念之一瞻企

遊橫山

薛 棻

橫峴吾西鄰瞻謁乃始此足跡半中原返顧發深恥不因鼓棹紆
安覩暮光紫陟巘覲靈湫幽貞賁潭水潛鱗負青冥至性能自理
是時秋冬交木石斂浮氣斐亶結丹楓空巖靜彌貴獨悵僧餐鐫
諸天寄煙際返棹叩深更夢亦有神理仙眞及宿將相招采蘭芷
惠山至永定

王 鑒

解纜惠山下問道荆溪程荆溪百里遙蘭漿蕩空明沿湖好青山
宛轉送我行惠山甫見辭陽山復來迎東西夾畫船依依亦多情

忽然互回合隱若百雉城西南豁中斷太湖渺然平范蠡解越相
此口云所經懷賢不可見臨流濯長纓

聽松

邵寶

聽松復聽松松聲在高閣閣成四十年聽者今如昨風來春濤生
風去秋濤落當其無風時蕭然亦微作聽者聽於斯冥心對寥廓

宿江陰廣福寺

杭濟

我非山中人暫借山中宿靈風散微陰片月出喬木蕙帳棲夕香
古寺浸寒淥名緇多夙契延坐同茗粥況與靜者俱繕性久已熟
清辭儼陶謝立譚幹身毒所愧形迹拘無由繼高躅聲殷江島波
露氣藹林麓良遇愜素懷徘徊至天旭

遊祥符寺四首

杭濟

蹇予愛山水乘興來登臨
藕花白盈池蒼筤香滿林
脩篁翠瀟瀟古木陰森森
道人重儒術長揖求新吟

青山天愁盡寶刹世所稀
萬壑松濤翻四簷花雨飛
同遊非俗客相見多緇衣
猿鳥不驚避知我心無機

浩浩太湖水隱隱小靈山
地僻人事疏僧定道心閒
白雲自舒卷幽鳥時往還
詩成興未已蘿屋重躋攀

湛湛千頃波蒼蒼萬里山
鳥飛鏡光裏人在畫圖間
香雲藹蘭若清風掃松關
乘興恣遠眺日斜未能還

江閣寄友人

楊儀

江漢會極地波濤際天流偶來寒林下霞彩凝高樓飛帆帶雲影
倏忽淩十洲平生大觀志局促未得酬詎意圭竇中八表能神游
却笑市朝日役役空煩憂

渡江

殷雲霄

大江渺雪霽波濤生遠風帆帶毘陵雨權關馮夷宮清歌綠雲上
奔沒駭魚龍冥漠無端倪六幕烟霞空一鳥忽歟舉浩蕩莫與同
萬流西南來頽然遂徂東坐送千里目海霧何空濛不見蓬萊山
焉知浮邱翁乘桴嗟孔聖釣鼇想任公道全俗可遺神往物匪豐
終當遺凡蛻無復悲轉蓬

毘陵王世臣厥祖太常卿東齋厥父承事郎東皋而世臣號

思東蓋不忘乎先也予故爲之賦

倪宗正

東齋天下士家學詩禮宗名位聿以起貽謀垂無窮偉哉東臯君
灑灑振家風源深流自遠實大聲亦洪又見思東子言念祖父功
欲以誌不忘厥號曰思東東齋未寂寞輝光見顏容東臯尙突兀
登眺追遺踪茲念良可嘉德業期日崇

寄靖江朱醫官

倪宗正

我憶海汀子採藥海汀邊醉歌竹枝曲春泛桃花船
放鶴已通仙君王賜恩澤裘馬五雲鮮

賀趙孝子旌表

蔡景

砂阜孕奇璞秀出芙蓉青泉深白龍卧林靜立猿鳴偉哉趙孝子

山水鍾奇英祖父昔遭亂身殞家亦傾時方居襁褓萬死潛孤形
艱危脫虎口家眾惟有承匪依舅氏姑保抱誰能成恩深教仍立
韜絕根復萌時平返故里田廬欣再營居安心轉惕母氏嗟曷迎
陟祀望南北東西邈難憑精誠貫金石一念徹杳冥音傳思殊亂
指嚙神亦驚孤衷日皦皦片影雲惻惻履經羣蠹疾葦泛洪濤輕
彼蒼竟垂憫默俾之四明一朝忽相遇離思如春冰綵衣炤吳越
白髮還家庭熙熙復皞皞此樂孰與并陽春浩無涖寸草伸微情
穎羹奉彼適義馭馳莫停霜萱委晨砌風木悲秋聲攀慕劇號籲
寤寐瞻儀型孝行世可重幾人能力行黃泉已埋骨青史常標名
天恩錫旌表里開生光榮蓼蓼朱康叔千古堪同稱作詩告來世

俚語非無徵

馬洲西浦與殷近夫別

孫一元

離節動青郊高筵敞江濱哀觴爲歡酌溫念忘客身連山瞰水陸
水明眇烟塵清臆升木末長風吹遠津桑麻接上國炎海爲南鄰
生聚豈鹿豕行當逆龍鱗結交非在多要得允衷潛古來豪傑士
寄託各有因患難苟相得誰論骨肉親政當篤明義安可辭苦辛
結此園中草炯言懷好春

郊行卽事

黃傳

茅簷白髮翁閉門織麻屨朝夕不暇給那足供官府我聞長太息
垂頭不能語去去趣歸來遙村省編戶

郊行訪近齋先生

錢德洪

和風扇郊原草樹綠成綺欣然出郭行偶過柴桑里新漲拍斷隄
初荷覆幽渚隔岸桔槔翻壠畔歌聲起農夫饁茂陰殷勤話晴雨
令拙民亦安地僻俗猶美高人川上居開軒面流水呼童具盤餐
相與論治理日斜命駕歸炊烟滿墟市

秋夜漫興

趙大河

明月下高梧白露溼幽幌攬衣步虛庭涼思一以爽素琴謫餘音
清尊謝心賞獨鶴叫中天令人發遐想

遊惠山酌泉次唐人韻

王世貞

窮溪迴崇巘午色正蒼蒼上有千尺松下有古時堂幽籟相間作

止烏顧我翔乳竇溢清漪杲日媚其光眉宇澄秋色齒頰散天香
念彼尋源人慨焉不能忘

落日饒遠態羣象來趨人酌此澗下泉爽焉各懷新晴壑穿文流
白石何磷磷豈不念遠達行當委時塵洗耳卧空山抗志薄青旻
頽仰千古士思與巢許鄰

精若□□林泉伏蘿樾躡步信所之漸與人徑絕顧見潭影空
倏焉超生滅叩斧斲澗雲負鐫煮山月朗詠二君篇清商四垂發
千秋庶可要與予偕首轍

將游陽羨過華明伯餞我惠山因憩俞氏園中

王世貞

曰余淹邁軸託志在延搜遵途告密戚餞我以行游遐勝豈必遐
貴在獲所求青松夾長坂綠竹被文流探蠡酌清泠沈憺灑然瘳
層霞緩川暝歸日使徑幽流憩仲蔚居時興濬冲愁昔攬竝大藩
今守各一邱寄言天路者寥廓多沈浮

發自義興由東沈抵湖次

王世貞

揚舫出荆溪溪流浩無盡疇謂當蕭辰青山吐餘潤驚鱗發潛響
振羽橫遙瞬時見空翠來焉知余榜進喬木生午烟場禾表秋信
茶叟攜筐歸行歌渺然近顧余若有適壺漿當爲引明發從此辭
中宵衣時振

由張公後洞出前洞

王世貞

冥搜出天巧遐尙窮眞域猿飲迫相哺鳥伸駭所獲金膏時自閃
瓊乳靜還滴窺天一線杳察墜千鱗坼雲烹丹竈溫芝耕石田瘠
信足如已窮俯身忽中闕浴日萬象開琉璃成五色芙蕖冠瑤柱
玫瑰填蘿席締構疑化城陰森恐蛟宅張公何爲者自言得靈液
千載垂空名其人鬱爲腊攝衣雲霞顛矯首三歎息

出張公洞經游玉女潭

王世貞

疲足辭幽界敞目凌玄都篁翠上交天楓丹時綴塗高霞冠璇表
流颺蕩銀鋪躡步瞰澄潭恍若邁神姝青崖覆蘿髮紺水湛明臚
神往境自超象勝理亦愉匪耽交甫好冀與禽尙徂

探龍湫因觀古瓊樹

王世貞

素秋送餘晷深山饒伏奇賈勇若無先獨造中所私納雲穿奇構
畫石置清漪天規隱叫窾壑舟入逶迤拊足唱高音泠泠石幽屋
修榦吐潛虬舞蛟出驚枝昔賢歌瓊樹今我復來茲俯仰千秋意
泫然令心悲

游善權洞作

王世貞

巨靈可蹠拓混沌七日開陰崖忽中敞萬巧紛然來廓如白玉堂
瑰柱芙蓉楣天洒滴瀝垂石燕縱橫飛泫泫含霧華燦燦銜沙璣
覩深時中賞曠朗使眾怡仙掌瞬若招便娛勝柔荑謂我爲王烈
授我赤石脂靈境難久卽怙悵以徘徊

善權水洞

王世貞

出幽託奇秘，存至諧智樂。朱華嵌巖椒，白雲圍衡壑。羣溜何泠泠，爭往若有託。奚必中宮商，宿欲卽天樂。飛空浥蒼翠，懸沫成丹臍。靈禽啁晰言，神鱗時騰躍。空浥鳴沿泝，微寒生回薄。逝欲偕琴高，周身鮮靈藥。

碧雲寺泉

王世貞

蒼龍戢其首，日夜漱寒玉。助爾松風聲，借之竹色綠。時從齋廚下，泠然注空谷。自愛穿雲多，焉知出山濁。一酌聆斯言，徘徊愴心曲。

泊舟虞山下

王世貞

明當向城府，維舟此山足。奚必遂登臨，聊以驅吾俗。新月未擬規，浮雲更成璞。西龍獨何爲，移書就殘燭。

二瑞篇爲靖江朱生頌其令陳君也陳君自臺出爲靖江有
異政而感甘露嘉麥之瑞故頌也

王世貞

皇靈大動變鼎席乃頻移天澤不自祕屯膏布宏施江介有神君
卓魯受良規欲觀馴雉化稍戢神羊威湛湛秋夜零瀼瀼露未晞
承之炯如玉味之甘如飴大地春風來來牟亦吐奇同穎表一心
其穗昭兩歧昔聞上元令清心感恩滋復聞漁陽守異政假靈祇
赫赫我仁君斯瑞乃兼之祝君壽無疆惠我樂不支

俞山人公臨卜築陽羨賦寄

王世貞

京洛饒賢貴吳會富華腴雖復堪身口要非中所愉仰希上皇風
俯卜靜者廬荆渚無濁流陽羨有幽區山自離墨來溪由罨畫舒

以茲耕蠶業不復廢詩書春問茶女茶秋逐漁父漁朝饑拾野穗
晚供剪畦蔬蓬累故何滯鷄適當更餘竊從柴桑叟相爲咏移居
毋使車馬知令汝蒼苔疏

贈沈飛霞

袁宏道

江上逢老郎六月雙重布瞳神戢電光飛白寫輕霧口不絕吟哦
喃喃若有訴不知腸幾寬容得許佳句黃金類仇人抵死不相過
文章如可典且爲作詩庫

夏日過徐穆齋先生

許學彝

幽閒靜煩暑松竹蔭前除清風颯然來散亂牀上書皤皤林間叟
披腹呈璠璣愛客同宴坐談諧盡黃虞高文激古聲三歎忽起予

卽此有真樂何心慕元虛

秋夜送戶部家叔登黃埠

華察

離亭對衰柳落日送行客秋聲在孤嶼興來恣探涉臺殿澄夕陰
明燈照禪室夜靜山月高潭虛映空色水鏡清道心超然垢氛滌
浮雲亦何意聚散隨所適風葉逐歸蓬霜空起寒笛

清溪莊

王立道

日入理輕棹所欲避人喧沿洄清溪側迢迢見孤村始疑松菊徑
復似桃花源林際見明月浦口聞驚猿嘯傲倚修竹步履隨芳蓀
本求於陵隱欣得辟疆園杳與塵世隔將同漁父言

洞虛錢道士樓居

王問

涼風動高梧登樓挹清暑於心無所營永日自閒處流雲生遠空
當晝忽微雨江禽帶溼回枝上相對語

栖雲山房

王問

春晴出門去林花亦以繁移舟泊烟岸步履至空門日暮向東院
歸鳥寂不喧自得澗中意勿與山僧言

秦從川先生修尊賢祠詩以記之

彭輅

採此南山蕨酌彼清澗流流澄蕨復肥將以奠前修無錫稱壯邑
諸賢盡琳球處者表巖穴出者襲皇猷文采懸照灼儀型日已道
懿哉銀臺君葺墜勤其搜舊宮拓新製煌煌來道周不有伊人揚
其誰覩前休懷古兼諷今我欲往從遊秋水浩瀾望蒹葭滿江洲

喜復二泉先生再涇舊第兼謝尙按君仰山 華雲

藹藹秩宗宅疎林依冉涇
麟鳳不世有傑人稱地靈
跂予方蹇步負笈登斯庭
橫經傳素業清齋惟鳥聲
白日忽西匿嗟嗟梁木傾
不見尙書履猶存節孝名
桃李漸摧殘飛蘿秋冥冥
夫何銜芳餌空坻來俗情
賢嗣值辱瘝熒熒憂弗勝
幸逢乘輅使奕奕新祠成
檄書禁樵牧凜凜冰霜清
駐節祇修謁束芻存典型
願比鄭公鄉千載無侵陵

題天椒山

白昂

句吳敗越兵鏖戰此山麓
麟經奚特書檇李仇能復
往事已成塵草莽空遺鏃
我來謁山靈秋深月方朏
邱園老蹲鴟湖田徧禾菽

今歲幸年豐國稅無缺縮喜從絕頂登高曠縱遊目仰舒千古愁
長嘯振崖谷

李相書堂

吳鳳徵

公垂讀書處千載蹟猶存所讀果何書致身非素飡吁嗟簪纓客
宿好不復敦志損田宅廣躬卑官爵尊所讀果何書乃謀飽且溫
高山既可仰彼哉安足論

偶約來元成蕭公木遊孤山適願修遠自延陵來便拉同往
舟中分韻

來集之

生長山水間情與山水忘三來驥渚遊僻壤截橫江百里鋪平沙
平葦雜蒼茫遂起故鄉思因知泉石香秋水盪素舸良朋治豆觴

孤山昔一拳浮浮水中央
混茫結元氣棹持歲月長
四面蓄其根孤骨雄昂
藏欲墮復不墮壘石相扶
將我定物自移海水失其狂
仙人發浩歎枯岸生樓桑
人聲語茅屋平坡雜牛羊
客來鳥不驚寺古松氣涼
佛面網蜘蛛僧貧畫掩房
行吟一周遭江海恣遠望
久矣未見山清夢渺無方
穆如逢故人兩兩意相當
此山有氣骨故人有肝腸

偶過驥渚值蕭公木來元成泛舟往孤山因其載遊賞

顧宸

出門亦偶爾倏忽又已秋
貧身彈無缺飄飄不繫舟
問子何所之只此古江流
謝屐曾不停獨闕孤山遊
我友三人俱載酒水之漚

招招呼我涉嚶嚶氣相求來子不乘車戴笠堪與儔錢子肝如雪
吾與盟白鷗公木久別予相看話不休舉頭山咫尺攜手佳興遒
故老說孤山孤山水上浮桑滄百年變漠漠盡平疇尙有面江勢
不起背其樓我來登其巔遙瞻海十洲山後石離立氣象橫崑邱
尙羊坐其下日落挽不留冥搜得詩窟共歸風雅輶霏霏吐玉屑
不甚角觥籌舟子非長年蒼頭代黃頭岸泊更初漏星明照邸愁
此際吟詩者莫笑學三偷

別仲氏後夜行晉陵道中

華叔陽

悵別意未釋理棹從宵征回瞻百里塗馳颺引颿輕疎簾淡天影
虛枕來溪聲行子漸以遙孤月猶自明扣舷歌清商繁露浩然盈

鵲飛無聯翩雁斷有哀情
騫舉良足歎淹留獨何成
不寐多所懷歎息靡由平

送玄卿唐主客北上

華叔陽

子真臥谷口曼倩狎金門
閭里順流止應迹靡靜喧
謗余違時用養晦依林樊
彼美名世才策足趨天關
威鳳揚德輝羽儀眾所尊
矯矯雲中鴻相隨羨高鶩
秋浦生新潮白露下平原
臨觴不能銜我思鬱以煩
壯士輕遠別離愁安足論
何知非日月東西代晨昏
相期固金石毋負同心言

題止園

吳亮

大道無停轍宣尼豈不仕
當其適去時可以止則止
陶公澹蕩人

亦覺止爲美偶然棄官去投跡在田里定省願無違逍遙情未已
更有會心處翳然契林水但得止中趣榮名如敝蹤

桃花塢

馬同春

昔觀桃源圖今見桃花塢徒聞今日名不見昔時樹繁華易消沈
蘭麝終塵土誰能繼芳踪栽花徧林園欲問桃源津愧我非漁父

苦竹津

馬同春

風帆過東湖舟泊苦竹渡岡頭苦筍生沙洲起孤鶩細雨溼前途
依稀日將暮沽酒向花村酒家何處住屐頭泥滑滑行人宜穩步

分水祠

馬同春

卓彼山之阿有祠翼然出傳云稷庶子禹時嘗輔弼疏導厯三吳

元功紀史筆歲時薦蘋蘩伐鼓奏靈瑟整冠揖神祠寒山半銜日

題周孝侯廟

釋宗瑩

皎鏡無留塵例井有清汲人能悟本心何事不可立怒蛟匪難屠
猛虎亦易繫百里三害除一悔眾美集煌煌平西節戰壘獨深入
殺身酬主知忠義表州邑遺廟長橋濱南山遙拱揖岸葉泣霜紅
猶疑腥血溼慨世非無勇聞過苦不及平居憚改作胸次紛戟級
或尙氣粗豪或徇己拗執爭雄鶩聲利臨危死憂悵安得天地間
如公輩數十爲明取舍機警彼驕吝習懷哉秋又殘些雨寒蜚泣

龍池白雲崖

國朝
楊大鶴

探靈尋幽歧躡步愜心賞山迴崖勢轉萬仞屹相向攀陟嗟險艱

到此喜無恙崑崙羅秋旻薜蘿敵青嶂崖頂藏澄淵龍髯不可仰
崖間走風雷古木皆奇創崖底淩層虛乾坤自泱泱雲隨石狀變
石抱雲根壯雲石俱微茫耳目一洗盪恍如蓬萊海長鯨峙白浪
水氣接太空神仙懸想像衣裳碧氤氲歸路繞筇杖

春遊兼葭莊梅花谷下三閔晝夜

董大翮

春風澹未暄素友謀幽始遵郭訪孤山地僻人雙似肅客過寒橋
列坐綠清溪亭亭姑射姿高嚴絕眾邇微颺動遠枝入嗅孤芳起
芥葉點山泉青莖供石几流觴間一飛元言陶俗滓迴睇羽霓客
冶笑紛旖旎千香併一風肥瘦朝昏徙皎皎月華生豔素增綦履
輕煙迴化霜浩影空於水宿就竹樓低魂夢依彼美四更青鳥鳴

起望遙千里飛雪滿空山處處眠高士還從玉嶠行縹緲尋園綺
草露溼芒屨孤懷殊未已長教鶴擎人詩思清無擬

月下觀第二泉

董時鳴

世欲多上人不背居其次茲泉本第一恬退隨所置山靜月當空
乘興偶一至水月暗相融不能辨所視耳得已成聲目遇覺幽致
玉宇悄無言碧澗益人智璀璨上下同虛涵小天地仰看名人詩
載拜

今皇字

睿藻一品題第一從此始陸羽本腐儒耳食隨口試豈知廉讓心
乃附泰伯義聲名處泰然千載徐徐意

初歸安陽山作

毛重倬

長風行高林短轂依下澤攬轡怯前驚登途迅迴策身退山水俱
心逸塵網隔疎牖接懸泉崩榛罅荒石清樽對玉軫澄流度金魄
悲響協調序孤遊眷良夕拂衣東郭恥舒嘯北門厄庶獲展微尙
希蹤息心客

拜吳季子廟下作

王士正

我行延陵城懷古心苑結讓德逸已遠流風緬曩哲州來季當立
高懷甯詎屑躬耕表遐志亮哉子臧節慕義永無窮豈碑字難滅
所悲於潛役國亂相更迭伍胥進勇士專諸濺王血遜位固高義
復命忍臣列春秋不名賢書札理當嘶嗚呼三代後斯風久淪絕

廉節起頑懦尙論義常竊縞紵思古人空祠颯寒雪

毘陵歸舟

王士正

泊船西蠡河解纜東城路涼月澹孤舟遙村隱紅樹杳杳暮歸人
悠悠渡江去

入春申礪第一曲訪愚公谷

王士正

已探鴻漸泉遂訪愚公谷名園倚申礪登頓窮九曲春雨響寒山
入門亂飛瀑聲聞瞰迴巒廣池澈明玉振衣仙口樓憑高放遐矚
五湖林際白九峯雪中綠山陰菩提場名香奉天竺中構甄叔跣
堂六通宛相屬齋名逶迤禮塔坪遙連璨山麓樹作曼殊花人宜水
田服南登肆志臺因憶黃公躅橋名石公墮履處迴眺青羊野森疎盡喬

木紅梅破珠林叢桂飄金粟緬懷愚公日精藍此新築清流吐茵
席名餐間絲肉蕭晨金谷遊薄暮平泉宿風流百年盡電光一朝
促林壑生蟪蛄竹箭任樵牧憑弔問浮雲榮落如轉轂來者復爲
誰臨風悲玉鹿

園舊屬顧氏
名玉鹿玄邱

惠山新亭爲吳無錫題

汪琬

峨峨谿上下鬱鬱山間松遙遙松下泉潄潄澗西東使君愛幽勝
締構抑何雄平臨九龍麓叩眺夫椒峯屢從簿領暇屣步披松風
俛泉布華榻裴回罷絲桐引綆自探汲味將玄溼同一漱生芳津
再酌蕩塵胸茲泉洵云清千載鑑寒空使君今亦爾流譽無終窮

祝英臺碧蘚菴

徐階鳳

漢代有佳人讀書附儒流遺蹟在碧蘚古佛同千秋苔封碣半露
姓氏篆如蚪妝臺不可問荒陵足冥搜怪石疑香骨閒花想玉鉤
澗曲泉聲咽山空洞府幽芳草徒藹藹野鳥紛啾啾危刹干雲影
殘鐘出樹頭固碑能不朽偃柏未全留訪勝一憑弔徘徊起人愁
粉黛從來假音容何所求化蝶更荒謬渺然望滄洲

鷺山小山也荒僻寒苦古刹皆頽西方聖人乃不能蔽風雨
余獨愛其石奇而古有若騰者有若伏者有若癭者有若猛
獸奇鬼森搏人者昔爲余舊遊地余老友止菴張子曰是不
可不再往便與偕行對賦一首

徐喈鳳

布衣兩間放窮老成書淫山靈不厭客杖屨同一臨風烟隨我前

入我雙空襟苔蘚暈蒼碧斑剝無古今歎息靈宮頽山鬼氣蕭森
出入走風雨龍象徒漂霍獨上怪石險踣踞山之岑勢欲與空鬪
萬古龍雷吟精魅不敢過常恐爲之擒下有馬跑泉披榛杳難尋
靈物鬼神護幽閤誰能侵坐聽半嶺松風靜如鳴琴久之生海濤
滄洲起余心始知山水間能使精神深

夏五月徐氏園聽荆溪湯恂如彈琴賦贈

徐喈鳳

幽人抱琴來小步東園竹橫琴石牀山鳥羽微肅肅蟬噪林逾靜
聲如漸離疏久之聲亦希惟見交柯綠一彈再三弄疎弦厭繁促
古音造平淡使我心氣肅精神返寂寞人澹遂如菊泠泠五弦上
流水漱寒玉調高聲激楚千山忽飛瀑山高何幾峨隱隱孤峯矗

孤峯渺何許平立青溪澳有時曼音發淥水南湖曲平沙落野雁
雁影連連續此時洞壑深餘音入空谷爲余起微涼衣袂風謾謾
曲終月初上夕陽下西麓秋氣犯長夏清光洗煩煥蕭條草木意
松濤拂平陸閒雲淡往來欲傍琴臺宿

仲弟歸喜劇成詩

金孜

衰病復歲暮北風侵我廬短褐苦不完尸寢當晏圖耳邊足音急
大聲忽我呼乃是我弟歸向我牀前趨披衣起相抱淚下沾衣襦
宛轉復諦視顏色亦已殊破涕還劇笑恍惚魂夢俱

前歲忽得信傳汝已云沒老兄淚亦枯哀哀望天末念汝當幼時
神解素清越夙秉守身訓庶幾罕肆悖何至昧幾先委棄豺虎窟

疑信既相半筮言亦屢滑精神夢相哭關山特飄忽今得真聚首
我亦再生活

怨汝歸不早愁我五六年家鄉喪亂後親戚鮮自全惟我四壁立
尙得苟且延倘亦先朝露此生永棄捐汝歸亦無兄哭我舊荒阡
今日再相見笑樂降自天但願偕白首慎勿去故廛

之官靖江拈筆言志

鄭重

伊子巖壑姿性情本澹泊一自綰半綸致身矢葵藿邑宰雖微官
億萬生靈託疇昔讀詩書期待固不薄分符得靖江黽勉試盤錯
綆短汲苦深中心竟如灼惟茲驥沙城其大可斗若孤懸江渚中
旱潦易爲虐昔時猶可爲此日真堪愕勞來云至矣民風尙治躍

亦復健大訟無情肆亦蕞所貴聽識明刁誣或可斫我衷素坦直
不冒事鉤索廉靜矢虛公情風一琴鶴憑軾咨利弊淚逐殘黎落
誰不畏考成先使安耕鑿子子敷蘇瘼詎忍蠹螟爾害馬洵當除
樹蘭更宜廊聖明急何事敢不念民瘼尸曠凜冰淵俯仰增顏忤
攬衣起傍徨江神共要約

讀書漫園文成示友

曹禾

少小愛書史不擬文人名開卷得大旨頗識治亂情爲學旣已疏
作吏非所營需次就閒曠考究搜精英樸藪背時肖淡泊與古迎
忽然漲胃腹山嶽時煎烹紙墨瀉不盡觸處聞砢礮君來有何慕
值我斯文成晶光倏開閤瞳也兩目橫縱使太牢美不敵天葩清

酌酒共賞之身世浮萍輕

灌園

顧貞觀

不自量筋力求爲人灌園意惟營一飽跡若避羣喧誰遺五色芝服之託騰騫奈非塵埃種移蒔安得蕃還將理菜畦膏澤資泉源龜勉試操作編籬復插撈早韭和露茁晚菘淩霜翻但從採掇便未覺烹飪煩心形誠若疲旣飽亦軒軒向讀神農書近聞老圃言

立冬日荆溪道中

顧貞觀

言辭故山雲枉溯清溪流羣木日夜疏空水相與秋迨茲農功畢霜明墟落幽帆輕惜飛渡佳處不少留烟火指河橋停燈待維舟誰云豐年樂可解寒宵愁斑白各已間我何爲客游

杜鵑花紀事

并引

湯原清

嘗聞杜鵑花有二種一產蜀中一產陽羨善行洞石壁間其花碩且大瓣有淚點對壁有閣三楹每至初夏遊人登閣玩賞則粉牆素衣紅光照耀人面如桃焉邑人好事者取孫枝植別圃中亦絕可玩然終不及原本之鮮妍也明季閣圯樹死幾二十餘年矣已酉萌芽復生孟夏發花數朵豈花之剝復亦有數存其間耶爰賦詩以紀之

山鵲開滿山蜀鵑未曾識善行洞壁間異種遙相匹初夏映日紅斑斑淚點涇靈物造化珍久枯還復茁頃聞花又開數枝如血色何事羈山中花時不相值蹉跎負歲華從此啼鵑泣

念別

嵇永仁

乳媪抱兒出送我里門首舟子舉布帆云俟河濱久擊榜衝鳬鴨
解纜雜烟柳盈盈岸上淚淒淒杯在手豈不立遠巡業已辭林藪
父母促治裝長跪出戶牖丈夫身許人難與妻子守但恐隔別來
骨肉得全否眷懷梁鴻溪愁雲結巖岫

雨後登惠山最高頂

邵長蘅

雨歇翠微深山光媚新霽拄策凌清晨松杉吐仍翳捫蘿已數盤
緣磴方屢憩平蕪鳥去沒遠浦樹如齊絕頂驚銀濤始覺具區大
雨漚浮日月三州縈衣帶森莽極無垠遙天與波逝羣峯散鳬鴨
汎汎烟波際平生懷壯觀興愜茲遊最下方隱招提鐘聲破蒼鶴

小憩漪瀾堂汲泉煮茗

邵長蘅

亭午谷島寂小疲憩空亭綠陰澗路暗泉溜鳴琤琤石池清見底
空翠漾檐楹虛牖嵐光碧高杉雲氣青知風翔珍羽古藤掛松甍
芥茗汲新泉試酌形神清我家國山北距茲百里程九載一來遊
惆悵塵網嬰巖棲竟虛願憮然愧山靈

夏夜漳潭村居

邵長蘅

夕風生微涼素月出遙巘林昏墟落微煙火遞隱顯躡履尋南溪
偃臥從所遣鼎鼎天宇青輝輝露花泫星流光易滅螢聚目屢眩
東鄰桔槔歸西老荷鋤倦壺榼蔭茅茨諧謔殊縷縷獨立宵每分
素心諒可展

竹爐聯句

并序

朱彝尊

錫山聽松菴僧人性海製竹火爐王舍人過而愛之爲作山水
橫幅并題以詩歲久爐壞盛太常因而更製流傳都下羣公多
爲吟詠圖旣失詩猶散見於西涯篁墩諸老集中梁汾典籍仿
其遺式製爐恒歎息舊圖不可復得及來京師忽見之容若侍
衛所容若遂以贈焉未幾容若逝矣丙寅之秋梁汾攜爐及卷
過予海波寺寓適西溟青士愷似三子亦至坐青藤下燒爐試
武夷茶相與聯句成四十韻明年梁汾將歸用書於冊以示好
事之君子

西神峯連延龍角沆泉歆

孫致彌

桑苎次水經第較中冷遜

姜宸

英

山僧宴營役谷飲遂夙願朱葵尊跣趺長松根風來耳垂鬚周

貧

都籃選茶具一一細莎頓張祐惠山詩重街舍彼陶冶工截竹

等辦餐致彌附以紅泥圀其修僅扶寸宸英坎上離于中下乃利

用弮葵尊微飄颺颺入活火融融煖質初聆檜雨喧漸見魚眼睞

貞觀

紫筍舒萌尖乍點湯色嫵致彌王郎穿竹過愛接支許論宸

英解帶磐石間素瓷迭相勸葵尊欣然愜所遇伸紙隨染渲貞濛

濛巖亭瀑歷歷水田畝貞觀短短茅覆屋茸茸荻抽蘆致彌橋敲

乃有路門闕或無楨宸英林壑雖未深埃壚頗已遠葵尊流傳盛

新詠羣雅足藝憲質或為篆籀隸若盍鬲敦膚貞觀或為真行草

若繇靖義獻致彌穆如清風作舉一可當萬宸英嗚呼百年來精

廬窟貙貓

夔尊

曩時所珍物零落委荆蔓

寶

吾家繡塘側想茲恆

繼繼

貞觀

形模授巧匠高下仿遺模

致彌

所惜七尺圖慮爲塵土

全

宸英

開篋逢故人輟贈得右券

夔尊

羊脂鏤璣玉獸錦束腰紫

寶

譬諸延平津劍合始無恨

貞觀

俄驚鄰笛悲永歎壑舟逝

致彌

蕭條黃公廬歌哭與俗溷

宸英

是物覩者希五都絕市販

彝尊

今

年吳船來載自潞沙堰

寶

徙置青藤陰旅話破幽悶

貞觀

質比蓮

芍輕形嗤石鼎鈍

致彌

小勺分宮時頭綱試甌建

宸英

忽憶秋水

生乘此風力健

彝尊

逝將掛席歸耦耕師下選

寶

毋令石牀空兼

使夜鶴怨

貞觀

梁溪道上懷東林道南講院

彭定求

憶昔從先子肅拜東林彥

王成冬先君始到道南祠

彈指二十年空懷蘋藻薦

今者片飄過征程鮮清宴
翩翩暮鴻飛翹首雲中眇當時水居人
還編起牋而慙同冉子畫愁似卜生戰至道豈難聞景行在狂狷
龜山勸學吟惜陰箴厭倦吾生衰晚餘結習何由變感此轉躊躇
坐想春風扇

咏荆南古蹟

吳本嵩

孤峯離羣出赴壑如盪潏軼宕開薦肩紆盤引鶴脰一一饒松柏
天風灑前後鍾離隱君子出沒忘宇宙名姓留樵牧將無傳記謬
野老策杖來樸僂雨衣袖指點如有見問答迷邂逅山居倘人世
吾亦猿與狖

壽楊賓賓同年尊甫紫來先生七十

吳 昺

直木不產危翹木不產庠夙昔誦斯語今乃信不疑楊子吾畏友
矯然野鶴姿清冰貯寒玉色映黃金閭振衣千仞岡揮手謝塵縉
肇基固有自趨庭得師資先生崇令德七十行不衰清明在厥躬
純嘏帝所釐新秋月初弦涼風動江湄萬象一以肅照我鬚與眉
交梨與瑤草一洗悠謬詞吹笙進美酒更奏南陔詩

同諸公遊龍池適見雲海

潘 眉

南山鬱佳氣西溪漾清光恢台入孟夏草木融芬芳獨坐苦不易
出門無我狂忽有遠遊客山川歷文章不以謫劣故持刺登我堂
我爲集羣彥蓬華輝琳琅譙笑當夜分義理精無方悠然得懸解

一飲盡百觴還惜此會歇俯仰成參商曷不揮世務溪山共翱翔
桃溪有賢主好客如孟嘗指顧百里近乘風渡滄浪閉門向春澗
主人正相望脂車復秣馬奴僕亦酒漿導客入空翠心神頓清涼
林端標寺古徑曲迴泉香山僧多靜意所示非荒唐盥浴覓澗壑
設榻茵松篁鼓聲振山葉雷雨魂彷徨晨起望絕頂有路纏高岡
各請廢車馬徒步褰衣裳徒步亦不前策杖凌青蒼膝鼻恆相觸
踵額長相當傳呼問前路甯復畏虎狼猿行三里許壁嶺爲園場
其上出方池中有神龍藏詎非池中物何時當奮揚嗚呼天下士
未許徒悲傷彥先絕騰躍休文何慨慷棄我成先登翻身踞玉陽
舉手招同遊共來仙人鄉摘茶沸風雨鳴禽奏笙簧披襟豁然嘯

今日風日良候忽四雲合波濤吞大荒天地原虛舟吾汝今何航
因思鴻濛初一物不可將俄爲狂風驅萬里嘶微芒厭山何纍纍
潮海何湯湯姑蘇一浮鷗北固列短檣異哉目未瞬變幻分滄桑
有石名試心有樓憑虛梁雲根石迸裂古佛此絕梁曾聞二猛虎
役之同羣羊

東坡書院

儲欣

先生產巴蜀吳會留精英騎箕近千載祠宇肅然清一構山水間
一傍南陵城蘭陵負手地萬古念淒清合祀楊龜山春秋薦兕觥
二賢俎豆光矇瞽知景行憶公僅弱冠抱書遊帝京驍騰凡馬却
咳唾羣公驚方當瓊林宴早結陽羨盟斯志半疑信斯言恐中更

幾見金閭彥溪山理釣耕崎嶇百折後荏苒二毛生卜宅依烟水
買田種秫杭幽奇遊屐徧色笑野人迎擇地同任昉離憂繼屈平
至今遺像在瞻拜淚縱橫

菽乳和楊芝田先生

朱崑田

淮南王食經八公九師撰惜哉其書亡饌法不可見偶然著遺術
吸菽物至賤叟叟井華淘齒齒石磨旋香同杏子粥細比葛花麩
若酪蹴乳房若芻撇缸面若蔗漿初榨若飴黍暴煎淋漓自長杓
滓汁濾生絹未明雞三號乍啟門一扇篝燈挂屋壁漑釜燃蒿藟
須臾魚眼沸以笮攪百徧圓紋皺冰穀斷稍揭霜練或以山礬收
或以鹽溲澀苦辛溫酸鹹方法從所便拉殼吳地能泡漿杭俗擅

我鄉近瘠貧醫者滿村堰魚標酒望間水車輻片片

禾中村民醫腐者以車輻

標于林表

移舟就客航壓擔入僧院綠葵紫牙薑清齋每同薦有時記

紅鰕食之已饒嚙乾將酒糟清敗候梅臠變其味益以佳往往走
異縣都人慣食肉羊豕日割剝是物纔入市塵沙糝如霰以此仕
宦家棄不錄厨傳編修在金門索米類曼倩不因官獨冷止酒罷
談譙藏乳造法殊其訣本陽羨黃豆來西沽紫磴徙南淀浸以一
斗泉漉用五尺帑流匙訝香滑舉坐盡誇銜脂麻與罌粟瑣細費
撇漩未若此易成指顧具鄉饌我本茹菴人羶葷非所戀春去秋
復來飛光等劈箭無心趁杯炙久欲焚筆硯有客誦新詩令我聽
忘勸壓倒孫滄螺濟濟眾才彥作者各擅場後來豈能先過門思

大嚼舍錢但白戰

追輓盧忠烈公

顧景文

桓桓盧忠烈吾父同年友弱冠偕公車弧矢不離手流氛暗楚維
先勦後攻守麾下三河傑望旗賊奔走洪盧兩督師威各播南斗
奈何國事非朝綱日解紐關門迫鐵騎勢若雷霆吼返轍事北征
賜劔主恩厚孤軍抗強敵致命不敢負同鄉有元宰切齒憎其口
外援絕虬蟬內儲斷糧糗日夜催出師揮淚躊躇久年月書墨綬
金印繫諸肘枵腹起搏戰軍亂失前後箭盡寶刀折一蹶萬馬蹂
部曲無一還伏屍積山阜朝端尙青蠅老親迴白首從此五六年
遂喪其君后令弟幼哲公兩榜如芥取感憤天步移氣結心欲嘔

字君人集卷之五 名
揭竿連綬勸訓練及童叟徒手攫虎吻得死又何咎吾鄉數忠義
公家實淵藪青史缺未修家乘付烏有摺摭爲此詩附驥期不朽

惠山品泉兼至秦園小憩

汪德容

佳哉惠山岑暝色一何深停舫聊縱步名泉恣幽尋一逕越荷媚
澄潭照清心品水試茗芽深淺自酌斟驚雷蜃眼沸淪雪龍團沈
澹中得至味澹彼無絃琴清芬盈齒頰餘興在芳林不見疏影好
微聞暗香侵靜憩小亭前忽聽山壺音于焉遂幽賞浩歌陶素襟

和三唐人惠山詩

陳大成

涼颼入林麓松檜靄蒼蒼層巒隱斜日白雲涵虛堂但聞鐘磬音
落葉隨風翔仰視秋烟直寒蕪延末光徘徊步山椒幽澗清泉香

不知今何時欲語心已忘

高樹摩青天山空隱幽人日月既代謝俄頃有故新流水清不已
白石何磷磷緬彼曠達士所以羞望塵登嶺眺湖光浩蕩接秋旻
遠峯七十二一一與誰鄰

杖策復登臨經聲出林樾勿言跬步間迴與聲利絕醉來發清狂
禪侶談寂滅高樓空杳靄林端漏微月遇物增浩歎懷人待明發
世事感所聞凜焉思覆轍

黃埠墩

姚夢熊

孤嶼起中流名傳楚公子一樓楊柳煙四面芙蓉水翠袖映雕闌
蘭橈繫香芷入山佳景多登眺從此始

顧光旭云此詩邑志刻莫健今從相南自訂詩集中

錄出
更正

雪後寒慄主人解衣謝却之

史周沅

畫粥已安之無爲變所故豈不味膏粱誰能改貧富感君區區心
希文久成慕敗絮可無慚家中有孺婦還思百結人風雪行道路
六月初六日遊惠山寺寺僧出觀竹茶爐詩卷爲賦二十韻
記之

儲麟趾

言尋惠山麓聽鳥攜雙柑返棹來虎邱帆風趁東南晴飛兩峯翠
雨過一溪藍屐齒易巖壑盤屋窮幽探扶筇木蘭院入門柳垂鬢
碑痕蝕苔蘚窗隙排杉枏乳竇汲玉龍終朝走巖壑松泉

御題宇石壁蛟螭參衲子涉騷雅開軒縱清談九華撥遺蹟茶經

亦舊諳更誇竹爐古繪圖老瞿曇鉅公拂絹素墨瀋清芬含訪爐
再復爐世守非云貪彈指四百年活火調餘甘我聞重感歎索觀
啟琅函龍蟠或虎踞一一壇坫堪檐端恍迎笑海棠宿雨酣予懷
此欣暢一日快事三持詩謝山靈鑄石吾豈慙薄暮盪漿去水上
鐘聲韻

張公洞

儲麟趾

石洞破山腹驚雷飛玉龍採藥亦仙去至今呼張公魚梁噴珠沫
鑿漣聲琴箏初猶索火照徐乃天戶通振衣上層磴雲影盪塵霄
奇石蹲獅虎山花無春冬出洞已巔頂指點數諸峯歸路躡鳥道
彷彿疑仙蹤

十字碑

儲麟趾

讓國遺徽遠士女競奔赴觀樂知音希獻紉同心賦馬鬣一坏封
尼父廟長句穹窿十字碑朗照扶桑樹吳公久寂寥館娃穴狐兔
叢臺碧瓦蝕鉛淚銅仙雨春深楊柳陂徙倚桃花渡緬懷彼美人
陳迹散雲霧老眼睇朝陽翹足一眄顧

藝蘭

趙曦明

春風穆然至微香襲懷抱披衣入市門幽蘭積如草貨賣等葱韭
顏色或枯槁揀取數莖歸甕盆養娟好憐爾芳潔姿使我中心擣
託根近樵牧出身尋與阜何如藏深谷荆棘相與老

城南懷古

楊燕詒

孤鴻不可羅乃在寥廓翔隨風游太虛渺渺雲漢旁不撓世俗氛
超步追義皇蹤跡同樵夫採薪登高岡五月正炎赫此身獨清涼
遺金棄不收披裘自徜徉忽遇吳季子高名從此彰

次女出閣

刑部郎中
吳楫母 左恭人

事母不嫁夫情至義不然依回閨閣中非復待字年六禮既已成
去去歸所天衰年戀歡聚別爾情可憐爾早失舅姑夫壻貧無田
我亦少裝資不與營釵鈿爾壻能讀書腹笥真便便富貴不可求
無逸戒所先爾勿慮我孤子孝婦亦賢聲聞在閭巷不越陌與阡
惟期勉恭順咏此雞鳴篇